

萬載縣志

400250.91

地 283/91

38

26



萬載縣志卷二十

人物上

唐

應智頊鳳嶺人隋末林士宏蕭銑迭據豫章智頊於華林山屯

兵置柵保障一方武德五年李大亮宣撫江南智頊歸之因

表置靖州命為刺史功德及民愛之如父母八年州廢改袁

州刺史更大亂後與民休息鎮以清靜民安樂之采豫章古

志補

按十代文獻畧引豫章記智頊高安萬載鳳嶺人以地本

屬高安後入萬載故併言之要皆從後稱也唐武德前邑

萬載縣志

卷二十 人物

屬建成八年始由陽樂并高安豫章書稱建成人較為允

宋震會昌二年進士為鄂州唐寧縣令贈衡州刺史檢校司空

文章政事俱有可稱其子訥天復二年攝鎮南節度使推官

守大理評事

廖洪進城鄉人居窮養親克盡子道大中九年安志作父母繼

沒捧土為墳結草廬其旁號慟無時髮未嘗櫛有青蛇如龍

長不踰尺止其側風雨輒失所在又大蛇馴伏廬中有鴈中

箭來下為脫箭敷藥創合乃去又有白獸相繼至鄉間異之

咸通中縣令朱郁以狀聞廉使京兆韋上其事勅以孝行感

應令本道特加旌表祀府鄉賢及本邑忠孝祠采嘉定志



按唐書孝友總傳亦載洪爲萬載人通志以唐無萬載改爲筠州不知唐置筠州一年遂廢通志亦未爲得也

鍾傳史稱高安人綱目實實從後稱萬載少業負販王仙芝猖狂江南大亂眾推

傳爲長稱高安鎮撫使仙芝遣柳彥璋畧撫州不能守傳入

據之言諸朝詔拜刺史中和二年遂有洪州撫民危全諷間

傳之去竊州以叛僖宗擢傳江西團練使俄拜鎮南節度使

檢校太保中書令爵潁川郡王又徙南平傳率兵圍撫州天

火其城士民謹驚諸將請急攻之傳曰乘人之險不可乃祝

以全諷不降民何辜火即止全諷謝罪聽命以女女傳子匡

時傳以匡時爲袁州刺史彭玕爲吉州刺史廣明後州縣不

萬載縣志 卷二十八 人物

鄉貢惟傳歲薦士行鄉飲酒禮率官屬臨觀資以裝齋故士

不遠千里走傳府傳少射獵醉遇虎與鬪虎搏其肩傳亦持

虎不置會家人至斬虎然後免既貴悔之戒諸子曰士處世

尚智謀勿效吾暴虎也乃畫搏虎狀示子孫天祐三年卒匡

時自立爲節度觀察留後節唐書本傳

陳節詳藝文墓志

南唐

宋齊邱字子嵩祖震父訥十國春秋作父誠見前傳齊邱少孤好學善

屬文兼習機變權詐之術豫章亂隨眾東下時李昇刺洪州

通志作金陵是既東下矣延四方士往依焉甚被親禮昇移安得復依洪州李志誤也

鎮京口朱瑾之難常參豫謀議昇入輔政修舉禮法親附賢士寬徭薄賦民用安輯皆其助焉昇欲進用之為徐溫所惡乃以為殿直軍判官凡十餘年不遷溫卒擢拜左司員外郎累遷諫議大夫兵部侍郎參議機密甚協時望吳主欲倚為相會請告如豫章改葬其父遂入九華山啟求退居吳主連召不至時李璟為大將軍遣使諭起之除中書侍郎遷右僕射平章事昇受吳禪遷司徒知尚書省以疾乞解職授洪州節度使璟襲位復召為相俄乞致仕出為浙西節度使表乞歸九華賜號九華先生封青陽公未幾復起鎮洪州悉以軍政委寮屬有終焉之計以所居愛親坊為錦衣坊大起第宅

萬載縣志

卷二十八 人物

三

日與賓僚燕樂數歲遷太傅

南唐書封衛國公賜號國老

保大十三年周

師圍壽春召還都計事

南唐書周侵淮北起齊邱為太師鎮劍南東川節度使進楚國公與謀難

齊邱固讓仍為太傅

明年諸將敗於正陽舉國震恐樞密陳覺與鎮南

節度使李徵古每對璟言齊邱是造國手今患難方殷請委

以國事璟不悅又明年璟遣鍾謨李德明相次奉表於周請

稱藩世宗使德明復命議割江北諸州以和齊邱言割地無

益遂得謝歸青陽卒年七十三著化書十卷理訓十卷行於

世崇祀鄉賢

李志

按陸游馬令南唐書各有齊邱傳出處更詳惟一作豫章人一作廬陵人似俱未確綱目質實則云萬載人通志引

南唐書及江南通志揚州府志俱云萬載而郡邑志又確載緬村故宅且崇祀鄉賢其爲邑人無疑

李徵古篤學有詞藻登進士第授起居郎兼尙書吏部郎中保大十年除袁州刺史敕改所居鄉曰懷舊里曰孕秀離都日賜以內庫酒入宜春界每經一村落必召耆舊親故藉地飲盡歡而去到郡靜理壁立不可干以私五季之亂袁州更刺史二十九悉武夫勲臣徵古至以儒術飾吏治循刺史鄭審舊址立孔廟備祭器絃歌獨不衰焉嘗以私財百萬代其鄉輸稅召拜樞密副使後以累賜死祀府名宦邑鄉賢

黎徐鑑學宮記

按萬邑自宋開寶始隸袁州觀傳文若徵古已爲袁人者

萬載縣志

卷二十八 人物

四

蓋載筆者傅會也以歷志相承如此姑仍之

徐鉉字乾壽一字鼎臣康樂鄉人十歲能文工隸書尤好李斯小篆交泰中爲左右廂兵馬使檢校國子祭酒兼御史中丞上言貢舉初設不宜遽罷又劾陳覺馮延魯罪不容誅但齊邱延己爲之陳請故陛下赦之擅興者不罪則疆場多生事者矣喪師者獲存則行陳無效死者矣請行顯戮以重軍威楚州刺史田敬洙請修白水塘實邊吏因緣侵奪民田鉉按視籍歸其主事後主爲吏部尙書入宋授率更令歷左散騎常侍太宗立獨直學士院從征太原軍中書詔援筆立成奉敕與湯悅同撰江南錄至亡國之際但以天命爲言諫後主

文尤極悱惻讀者悲之淳化二年貶靜難行軍司馬著有文集三十卷江表志稽神錄

徐鍇字楚金第進士為秘書郎齊王景達奏投記室為殷宗義所誣貶烏江尉歲餘召還授右拾遺集賢殿直學士重忤權要以秘書郎分司東都元宗愛其才召為虞部員外郎後主立遷屯田郎中知制誥集賢殿學士又拜右內史舍人賜金紫直宿光政殿兼兵吏二部選事與兄鉉俱在近侍號二徐宋李穆使江南見其文章歎曰二陸之流也後見國勢日削憂憤成疾卒所著惟說文繫傳篆韻譜方輿記今尚傳

宋

參洪武志

蕭杞字楚材新興里人宣和進士正奏名第六學遂於易精大衍數性剛果歷州縣多治聲終廣州通判市舶提舉祀鄉賢

參安志

劉昇暘字迎曦屢試不第筮易得蹇因號蹇齋世居煙築結廬謝山巔倡明道學人稱劉長者嘗與楊萬里謝諤友善皆有題贈

參李志

按舊志長者一名崇禮字掃之相傳為制置使允迪子廬墓謝山受學朱子與楊誠齋友善云云一名昇暘云云考誠齋為朱子前輩師友之說既頗齟齬允迪隆興進士後誠齋十餘年其子安得友誠齋蒙長者稱乎且允迪玉山

人退居後方建義學教鄉族何故輕去其鄉而遠葬謝山
皆叵信今觀虹橋族譜自始遷至昇暘已四世厥考源一
名允迪未仕乃恍然曰邑之允迪非玉山允迪也師朱之
允迪子非友楊之允迪子也舊志因同名牽合愈出愈歧
耳今斷從後說庶無疑焉讀書堂舊載劉宋當是傳刻之
訛長者本宋人也
彭道琛中嘉泰解額將赴京闈失怙恨不獲祿養遂隱居不仕
甘貧守約一切世味泊如也惟彈琴賦詩見志而已
龍以禮祥興二年舉賢良方正任本縣丞改江南建德丞皆有
遺愛致仕後居鄉沈靜恥於自耀人尤企慕焉

元

萬載縣志

卷二十 人物

六

張干崖字凌谿號南山獲富里人官臨江教授詳見虞集書院
記

敖仲實字若虛號玉溪白良村人舉孝廉延祐間任新昌州同

知有政聲重脩羣賢祠增祀知縣甯麟鄉賢姚勉各爲之贊

州人稱爲賢守遷西番大葉茶提舉三任中書行宣政院事

爲人樂施予結納名俊尤喜建橋邑中百里內外多其創立

而錦江牟村昌江三橋爲最著崇祀新昌名宦弟銓號玉澗

任梅嶺長官兄所建監每翊贊之子濟字百川任岱山厰鹽

司令重修錦江橋按舊志仲實玉溪誤
爲二人參新昌志改

黃璧字元瑜歐桂西鄉人識趣高遠沈浸古籍大德間應詔賑

饑恩例授江州權茶大使吳澂虞集揭傒斯歐陽元嘉其行

義皆訂交焉凡指贊三修學宮及講堂齋舍

歐陽朝字朝宗白水里人初遊夏果齋門學春秋第至順進士授瑞州路錄事歷官通山龍南二縣尹才猷懋著以文章名世學者改事果齋禮事之揭傒斯黃潛皆與唱酬入贛州名宦參贛州志

郭擦獲富市人左手及兩足皆反掌以右手擦地行因名母及弟皆病廢乞於市以養者十八年至正二年冬遇道人手藥五丸授擦隨服而愈然自是丐不應益窘復遇道人以五丸遺擦母母服二丸亦愈鄰富人有病如擦者以金求一丸擦授九却金鄰病頓愈感其德廩母子終身建有孝義坊祀忠

萬載縣志

卷二十人物

七

義孝弟祠參安志

黃盅字子中璧弟受業臨川吳澄學務沈篤必期至道澄器之

以女孫妻焉

舊志作以子誤

為題書室曰大本堂第至正進士

舊志僅稱

舉鄉薦

授龍泉教諭明洪武二年修元史以順帝事無實錄徵

盅等十二人徧行天下凡涉史事者悉送上官祀鄉賢

參吳澄行

狀朱彝尊趙伯友傳

盧湜號石溪歐桂東鄉蓮亭人性度曠夷行誼雅飭工詩文所著有海槎空語廬陵王從叔為之序歐陽雲汀謂湜樂府諸作不減唐王建張籍參嘉靖志

明

歐陽汝洪武六年舉儒士任本縣教諭性質穎敏學問廣博元亂後能以師道自立教有成效

龍鐔字德剛詳藝文墓志入山西名宦祀鄉賢

按龍長史守兵抗節甘死如節見於皇明通紀崇信錄旌忠事蹟等書洵足與黃練諸公爭烈惜史臣失採謚典亦遺乾隆二十五年邑侯張立中始立專祠詳教諭魯鴻記劉貞字文忠英敏魁岸少孤母坐之膝授以孝經隨口成誦比壯博聞強記書史無所不窺於所居之西闢靜樂軒士大夫多爲題咏晚年積書教子建桐岡書屋胡祭酒爲之記名流復歌頌之生平孝友慈惠處已待人一以禮人咸稱爲長者

萬載縣志

卷二十八 人物

八

子蓋有傳

龍儀字希文號鳳虞永樂進士任陝西永壽知縣廉潔嚴明胥役爲奸者旬日盡發之邑以爲神入爲刑部郎部多大辟未決不數月爰書悉定黃州寇起當道稔其才以同知往賊望風解散署郡篆期年愛民下士置學田官店以贍諸生立碑記之累升山東叅政著有龍江別集入陝西名宦祀鄉賢孫毓霖滕縣教諭

陝西通志

易復亨字子謙詳藝文墓志子節有傳

歐陽恕字秉忠生九歲孤執喪若成人從叔祖元清學博覽羣書已廢去舉業於所居旁構竹泉書屋集里中子弟讀書其

中暇則竹杖芒屨徜徉隴畝間課耕勸爲樂中書舍人蔣廷
暉頌其居曰耕讀山房學者因稱耕讀先生年七十卒季子
信永樂舉人官廣西賓川同知卓著能聲安福吳節銘其墓
彭昶字時顯舉人任浙江道御史嚴毅自持豪貴震懾當時稱
鯁直無避忌者必曰彭御史

翟昌甫家貧樂道喜讀書春夏移書於塔秋冬則樓時人爲之
語曰昌甫塔昌甫樓風吹四面搖衆人爲他憂獨他絕無愁
後以人才辟任郎官

劉蓋字迪誠剛直明敏力行孝弟第進士以刑科給事中巡按

湖廣表循良黜貪墨綽有風采論事忤旨謫通州通判尋復

萬載縣志

卷二十 人物

九

爲給事中言愈切直降嚴州府經歷卒祀鄉賢

易節字時中復亨季子器宇凝重蘊蓄宏深以進士授行人歷
禮部員外郎宣德間知四川成都府升貴州左布政使所在
至誠待人吏民不忍欺羌夷化服當觀政時聞母龍病請假
兼程歸躬侍湯藥祝天以身代母渴甚思菘菜時六月無從
覓仰天而泣淚霑襟忽青蚺銜菜從空下爇湯進之渴頓止
後又思食黃雀卽羣飛入幕聽其弋取其孝感如是卒於官
入兩省名宦祀鄉賢

系人物攷

楊資字永凝號友善早歲知名由舉人任浙江黃巖教諭益力
學日與諸生課藝卒於官子濤恩貢廷試第一例擢州縣以

歸大學士楊榮楊士奇府尹黃養正輩各有贈行作年七十
九卒性剛介弟瑾膺鄉薦不廢課督及弟成進士布衣蔬食
自若始艱嗣納妾知爲良家女卽送還之後正室生入子傳
三十餘孫派衍千餘人若攷仁維範維試汝宜維礪宏字萬
里以科貢顯皆其後也詳見墓志

郭瑾字邦器十歲遊庠嘗自謂天下事惟宰相能行之諫官能
言之吾得志不令此語成虛第進士授刑科給事中正統中
升都給事中六年奉命錄南京刑獄多所平反在科持身端
謹獨持風裁以論中官忤旨出知潯州未幾復原官八年升
刑部右侍郎理獄平允有數囚得罪當道諸法司欲致之死

萬載縣志

卷二十 人物

十一

僅獨慨然曰殺人媚人吾不爲也竟寬釋忌者思中傷之致
仕歸有朝臣贈句曰澤深刑部無冤獄品重黃門有諫章蓋
紀實云著有綠陰書屋集年八十三卒詳見墓志祀鄉賢叅
史一統志列卿傳

歐陽煥以歲貢入國子監永樂間授浙江上虞知縣政績盛著
升廣西按察僉事克振風紀

劉執中字處權歲貢任廣西平樂照磨地雜土酋嘯聚不常郡
守廉其清操委總巡召酋長多方開示以禮諭遣無復畔者
擢知湖廣江夏縣事冲和靜鎮豪悍俗一變以疾解任宦橐
蕭然江夏人如失父母年八十八卒

常質字敏實歲貢任河南開封府經歷民苦方某貪虐臺使者
按部質直發其奸竟被劾去郡中爲之謠曰開封若無常百
姓盡遭荒蓋指荒爲方云改瓊州經歷參安志

郭溥字曰仁瑾之子以歲貢任徐州訓導升敘州教授持躬範
士卓有典型子諤字王臣選貢任遼東衛經歷釐占籍之弊
清募應之奸績效甚著

龍以韶又名舜韶平生多隱德嘗有盜夜入室韶覺之方暑露
坐故不就枕先休諸婢僕手燭出盜者語曰若脅力方剛獨
不足自食耶能改行吾畀若資盜愧求脫予貲遣之盜卒改
行韶終身未嘗語人課子甚勤子時舉四川知縣另有傳

萬載縣志

卷二十八 人物

十一

龍駿字執毅篤學詩文力追先正宣德舉人歷官廣東河源訓
導翰林孔目刑部檢校天順間遷山東金鄉知縣廉明仁恕
吏不敢欺居家孝友親喪廬墓三年入山東名宦參山東志

李瓊字蘊素舉人居鄉裁成後進惟恐不及歷任廣東高要縣
順天府訓導升詹事府校書翰林院待書遷汀州知府建學
賑荒決訟如神吏鮮侵漁之弊值上杭寇發征討無功瓊躬
詣寇穴陳利害寇悉釋甲歸罪境賴以安卒於官祀汀州名

宦本邑鄉賢

參汀州志安志

何英字實夫成化舉人仕至南雄教授勤躬勉職學務主靜立
敬經史子集靡不該貫尤精於易尋繹義理耄耋忘倦

龍時舉字用之成化中貢太學任四川彰明知縣侍郎謝一夔
爲序壯其行在任清慎有治聲龍州土酋嫡庶爭襲以賂故
久不決時舉往按賂者又至給之曰得爵而我謝未晚也酋
以爲親已不疑因得鈎致其黨一鞠而讞定弱者得直又有
大姓犯大辟傾貲求出卒論如律已而移疾歸至潯陽無儻
舟費家人典質往逆焉家居裹足公門子姓治經者數十皆
指畫口授之客座一聯云雖無金帛分宗族祇有詩書教子
孫可見其槩矣祀成都名宦

柳萬春字廷秀穎慧十四入泮方伯易節奇之以女娶焉中副
榜以歲貢任湖廣麻陽教諭與諸生以行檢相勵講授得麟
經奧多所成就三署邑篆有循聲士民咸戴之

伍祥字士吉號東溪由歲貢任湖廣祁陽訓導殷勤課士士皆
德之九年告歸諸紳繪像賦詩以贈有伍家萬載家聲舊之
句蓋祥累代仕宦有五世金門待漏圖嚴介溪爲之序
李瑄字子玉歲貢官廣東揭陽訓導愛士如子請諸有司蠲其
徭役秩滿歸諸生泣送贈以榕江餞別圖子舜舉亦貢生任
南雄訓導孫士良廩生

辛止爵字天錫號受侯歲貢任潯州衛經歷郡守夏雲盛服其
才事多委之適寇亂以退敵自任命心腹以貨郎入寇預爲
內應夜襲之殲其魁餘黨潰散夏以軍功薦丁艱歸不復出

麤飯布袍不改寒素卒年六十八子燦寶忠厚端方知縣陶
舉鄉飲孫拱宸邑庠

張欒號松軒約已好施歲饑賑粥見橋路壞者輒修葺族孫某
有侵欺責而代贖之族某貧鬻身贖以貲更爲成室鄉人推
其德望爭負多貲成焉土俗午節競渡每爭鬥至溺死欒先
期召里人飲之酒願自今歲始無角勝至時自賃小舟泛中
流龍舟分道馳自此無復以競溺者宸濠之變知縣張以欒
有膽智委解軍餉給路費不受詔賜粟帛冠帶有紀恩詩云
棲雲野鶴戀林塘姓字何緣入帝鄉珠粒銀縉榮野老嵩呼
萬歲謝君王百歲時有自題詩邑宦彭澄問以延年術答云
萬載縣志

卷二十 人物

十四

青精大藥駐年華絕粒餐霞自一家盡道長生能辟穀不知
仙飯有胡麻卒年百有七

按府縣舊志欒俱作鑿今據家譜更正

彭顥字遵道生平磊落不羈身致富饒每語人曰天生財必有
用無則取於人有則與人烏用作守錢傭爲義舉甚多族鄰
告乏則周之或稱貧不能償卽焚券喜賓客四方賢士入境
必延致盡情正德間知府羅輅檄修郡城顥領其半餘人營
營未知所措顥旬月已畢功後以輸粟例給冠帶城北有巖
蒼翠幽鬱顥多植花木構亭其上延賓課子日夕遨遊自號
翠巖居士以子澄貴受贈典太史唐順之表其墓澄自有傳

張鑑字時重總角能文入伴後益嗜古學日誦千百言貢入監歸與有司往來便便有捷才所居被回祿縣令張邦穀給官地一區爲樹屋贈以詩曰居中有一奇男子手執經書盡日看謁選考上等授淮王審理副以目疾乞休居林下二十餘年每有所作命孫輩代錄子染字靖馨穎敏有父風嘉靖歲貢官雲南江川令七年愛士恤民孫漑字以達和平教諭樹舉人另有傳

龍瑗字文玉時舉子貢入太學屢試高等購古今名集法書閉戶誦習卒業歸文翰一新授湖廣黃州通判卒於京著有東臯五更草

龍玠字桓玉瑗弟貢入監選廣西桂平知縣多惠政徭役之編尤詳察均平大吏頌其式旁郡桂平地雜獐狍綏馴不易玠撫叛獐數百人不血一刃民皆德之性明敏剛介而溫一覽數百言終身不忘工詩善易尤樂導人爲善所不當意面斥不少貸弟子多成名者著有怡雲懶仙吟

彭澄字一清號龍溪中嘉靖亞魁任永州推官聽獄平允擢太僕丞升工部員外郎命治南河於時河塞隄傾水汎濫二百里間餉運苦之澄議復河故道會歲饑請發帑以募代賑不三月而工集遷河東運副擢守延平多惠政值海寇犯順浚隍練卒境賴以安議割漳泉地置大田縣增修郡志顏其堂

曰忠愛聯曰青天白日惟三事暮夜黃金有四知三載入覲
移疾歸晉階一級卒年七十五祀延平名宦生平丰采端凝
內行克脩邑稱醇德君子晚年究心詩學擅一家言著有恕
庵遺稿守延迂見天游別集寓鐔稿其思崑宦游二集則皆
贈言足徵所至宦績與贈公隱德云子天補天禩有傳

鮑良材字國珍幼穎敏年十三入泮試輒高等九赴棘闈弗售
遂棄去以詩古文自娛與彭澄諸人唱和甚多家僅中產喜
急人困有難娶者多方翼成之嘉靖初部檄鞏縣城民不堪
役良材子身訴當道得緩舉其勇俠如是居家孝友邑令徐
一唯聞其名造廬訪焉贈詩有愧我遠非關令尹爲君超邁

萬載縣志

卷二十 人物

十六

古希夷之句卒年七十一遺稿被焚不傳

龍士通字允升號對山舉人任福建長汀知縣地饒俗黠以廉
靜鎮之民間有賢哉縣主青菜豆腐退食優游民得安所之
謠家僮三人不耐清苦逸其二嘗題署聯云一力自隨官舍
足獨衾無愧夢魂清高御史蒞按閩風力嚴峻特薦之遷彰

德同知旋卒祀長汀名宦本邑鄉賢

黎安志

彭渾號蒙泉由增生入監選光祿寺監事耿介自持兄澄守延
平屢以書招不赴一意課後輩子天祐北監有聲孫紹蕃著
齡入泮晚年棄舉業浪游山水多修菴寺橋道鄉里稱善士
龍國重字仁卿時舉孫由選貢任湖廣鄱縣訓導升福建浦城

教諭需次吏部時見都民火甲之困卽疏以聞不報人服其
敢言

龍國相字明卿歲貢需次都門以文爲活公卿爭羅致之題贈
多假手授南直崇明教諭

龍國賢字愚卿以字行歲貢任南直隸無錫訓導升蘄州學正
署嘉魚知縣淡泊自甘新學宮修預備倉士民歌咏之年八
十餘卒著有茅窾微聲集藏於家

龍國臣字瑞卿以選貢任廣東陽江教諭嚴以律已寬以訓士
其歸也諸生送至會城有泣者嘗戒諸子曰天道福善禍淫
大賢犯而不校可徵所養矣子允中字士履嘉靖舉人性耿

萬載縣志

卷二十 人物

十七

介知湖廣湘陰縣廉明奉公甫及考而母訃至匍匐歸遂不
出嘗畫像自贊曰甘餓西山寧蹈東海我思古人獲心千載
時權相當國蓋有感云素長於古文有祭汨羅廟文九仙宮
碑序人傳誦之

張棟號環溪淹通經史性理以歲貢授浙江永康訓導升福建
南靖教諭值倭寇雲擾當道識其才命攝邑篆有治績交章
薦之旋以疾告歸築室石頭山杜門課子與友明唱和爲樂
有白頭不負垂髫志猶記當年赴館時之句卒年八十有五
長子以仁字樂山篤於孝友萬厯中由貢生歷任信豐上饒
訓導遷瀘溪教諭欽州學正所至爲士林推重家居十二載

後學多所成就著有鑑性纂粹卒年七十五次洵字以信性敦樸寡言笑亦以歲貢官臨江訓導昔高祖千崖曾教授是風澤未泯及洵泣任士類傾心咸嘆世濟之美焉遷教諭遂歸卒年八十一皆屢舉鄉飲孫文綸廩生

龍人俊字廷卿力學有膽畧嘉靖辛卯冬巨寇黃牯眼率黨入境抵其家適老母病卧俊奮擊手殲二魁賊由是遠避邑賴以安人服其孝勇後以貢官福建南平訓導

鍾憲鼎號石峯英敏博學三中副榜以歲貢任南直高淳訓導嘉陳生九齡才捐俸助之後陳登賢書任宜春令召其孫美入署課督卒成其名入謂愛才之報云美早歲入泮以孝義

萬載縣志

卷二十人物

十八

稱娶宋氏瞽一目母蹙然憂之跪而言曰娶婦以事親反貽母以憂不孝滋大仇儻愈篤母心順焉母沒廬墓三年後以貢任餘干教諭講學胡敬齋祠聽者五百餘人卒於官著有詩稿

藍珏號近山積學有幹才以歲貢任浙江嘉善訓導捐俸卹貧士民死無歸者助棺瘞之倭寇竊發院道委守北城寇不敢逼升福建晉江教諭復遇倭亂中丞王咨以兵畧寇平升惠州教授山賊又亂撫軍張杰資其謀破敵薦擢廣州通判卒於任珏性孝友所得俸悉均其弟未仕時有侵學地置水碓者親訴撫軍傅以清復之遺有近山在望冊藏其家

參李志

龍以仁字子善郡庠生遊鄒守益之門有至性生甫一年母彭
卽逝稍長結廬墓畔追服斬衰三年彷彿母姨像圖之飲食必
追祭事繼母易及鄧咸得其歡父三綱邁疾衣不解帶者數
月先後葬祭悉如禮廬墓凡九年感白雞號犬之祥集木漂
還之異郡邑上其事祀忠孝祠遺有瞻思堂集 泰安志

葉璽號可亭舉人歷知浙江雲和景寧縣事遷池州同知清白
不染所至有竹葉清之號解綬歸日手一經課子孫好古多
著述成一家言刻有發祥堂草 泰李志

朱良佐字守忠進士授淮安府推官清操有爲擢兵科歷戶科
都給事中美秀而文時有朱黃門之稱彈劾不避權貴如正

萬載縣志

卷二十八 人物

十九

中宮肅閣監停翫作通海運諸疏載大政記中升太常寺少
卿大理右少卿謝病還家四壁蕭然鄉評推重祀鄉賢

彭明甫字則誠嘉靖間由監生任南直寧國縣丞約已愛民有
古循吏風去之日行橐蕭然僅敝衣數襲而已入江南名宦

張賢傑字古逸性孝友甫二歲而孤時與寡母相向泣至不能
食比長喜讀目十行下會南北重役伯兄以僉解賠糧被繫
傑請代者三年家產盡遂棄舉子業爲謀生計無何兩兄相
繼歿且無嗣傑事二嫂有加禮生平公正和易處宗黨無間
言里有忿爭不平片語立解稱爲彥方大邱晚得子璧親自
課督愛勞備至遇考試雖二三百里必親挈之行重爾不惜

璧卒成大名贈雲南按察使叅議

辛光佐字蓋臣號古泉慷慨有氣節貢入京適族兄某解帑虧銀三百兩監追無措知光佐將至謬指爲胞兄欲揭部光佐呼與語曰同族有難自當纓冠相救何必爾乃貸以償歸而索負者至復盡鬻已產歸之不責報任浙江安吉州訓導持身率士師表儼然更加惠貧士士傾心焉甫一載以疾歸歸逾月而卒卒之明年孫敏道聯魁同日生皆登賢書爲知州咸謂行德之報云子謙吉字抑甫性謹厚嗜學數科弗售遂棄去以督耕課子爲事晚年子敏道令褒城親書莫盡三尺法常存四知心聯誡之年九十一屢舉鄉飲

萬載縣志

卷二十 人物

二十

袁本初字圭善與兄本中先後應歲貢初任湖南衡州訓導擢浙江富陽教諭有師範士林悅服孫汝祝萬厯舉人篤學好吟咏建觀音堂於東門外讀書其中未仕卒

泰李志

喻濟時字汝霖世敦孝友祖嘉號南園博洽工詩父律軻構孝友餘慶堂儲書訓子著述甚多至濟時始大家聲由隆慶改元恩貢授南直隸歙縣丞攝篆黟邑有清操升四川墊江令以孝友仁厚爲化澆俗一變士民立碑頌之擢蒙化通判益務德教有孝廉范運吉者以內行著稱因厚禮之唱和成集士民興起夷酋悅服尸祝無異墊江子六仲子卿舉人署山東長清教諭季子良歲貢武昌通判

辛明述字學古號克信素性孝友自甘窮約不喜奔競以孝廉終

彭天補字表鄉號心龍澄長子生時父官太僕夢朱衣拊其背曰駟駒彭彭金馬斯臧天以補報因名焉由舉人官定州知州遷河間府同知時海寇不靖羽檄飛馳舳舻之卒一切仰給河間天補悉心料理事集而民不病凱還論功旋爲人齟齬改調東昌受事兩月挂冠歸構煉石別業日與友引觴賦詩年方六十思母李宜人不忘預爲壽藏於墓側曰吾旣不能脫身累以常事吾母身後復背之是吾所不安也未幾以病卒著有綸褒三世跋頌世德甚悉

萬載縣志

卷二十一人物

二十一

彭天禎字禔卿貌清質慧文采蔚然由太學生任廣東高州府經歷有能聲司梅祿權稅課溢前額爲同寅所忌移疾歸王書法酷嗜二王名家墨蹟購藏甚夥

宋一和字齊樂由監生任福建漳州照磨署漳平知縣冰操自勵有病死於獄者輒施棺座之參將其強佔屯田委之勘斷還本軍人服其公居家孝友丁內艱哭眇一日歿後邑人呈舉鄉賢移文漳郡稽查得實

劉冲宣其父碧富曾鬻嚴田石橋冲宣有父風嘉靖庚子歲饑捐金易粟賑濟一方全活甚衆後乃好浮屠重修光梵寺子金魁金耀萬厯窩寇之亂知縣徐一唯以魁才命帶兵追勦

寇平不居功耀亦好義輸穀二百石備賑得旌獎耀子良臣
娶石城王曾孫女助修丁田秀江二橋捐貲助貧不可枚舉
有高岡雅韻集皆名人題贈

唐緝賢字滄溪性孝友父七十而瞽賢每食必親奉行則扶掖
卧則理衾枕睡熟始離去蓋十年如一日爲親卜得吉壤以
合族太祖父母未有葬所卽先葬焉曾因累入獄見無告者
餉之並爲謀脫不責報歲饑鄉鄰多待舉火不能償卽焚券
兩舉鄉飲壽八十有九子應試萬厯癸酉第二名舉人萬載
鄉魁自應試始應魁廩生

易聖教號六虛父夢紫竹一莖上有煙雲覺而生聖教甫七歲

萬載縣志

卷三十八人物

二十二

塾師指庭前竹曰直節堪爲友令屬對教應聲云虛心是此
君十六遊庠讀書謝山深處有咏謝山詩母病侍湯藥衣不
解帶旣葬復廬墓出所積修西江橋開佛嶺黃田諸路宋九
儀爲之傳

張汝誠字純夫庠生痛失怙恃不求祿仕肆力於詩古文集叔
璧彭自新宋九儀輩交重之晚遊京師與吉水劉允陽姚江
魯雅存倡和所至留題爲人仗義屢周窮乏從弟貧力爲婚
配歲給膳穀會修鏡山路置林家磨渡船子仕綱邑庠

宋九儀字夔卿號鳴珂少穎異九歲應童子試三試皆第一十
二歲食餼由恩貢授福建建寧知縣尙文學除盜賊課農桑

禁巫祝戒溺女教化大行歲凶捐俸積穀民稱宋公倉九精
衡鑒識呂大綬獎拔之聯捷登第由是士知趨向科甲日盛
秩滿北上士民爭遺財帛不受乃爲立生祠九儀取木主歸
曰吾無德堪此公老無滋吾愧也還任請終養居喪盡哀廬
墓三年家食負郭僅三畝處之泰然嘗和淵明六咏見志著
有環堵漫言卒年八十一入福建名宦祀鄉賢黎安志

張璧字世良號崑岡第萬曆進士起家南兵部職方司主事游
歷武庫司郎中值營兵缺餉大諫璧單騎擒首亂事立定遷
廣西按察僉事巡左江却關門例數千金興學校課諸生定
交南黎莫二氏構殺之亂轉右江參議忤直指使改雲南右

參議分守金滄議罷大理採石革麗江樣金值歲饑斗米錢
三百臺司議以米代杖貧民無所得米有瘠斃者璧歎曰吾
寧違新法以一官易多命下令悉除全活數百人士民德之
以積勞謝病歸尋擢本省副使累檄不起生平急病讓夷爲
諸生時破產贖伯父賢仕罪遇人疾苦較方施藥有困乏者
稱貸必給至事關利害每赴公堂侃侃陳論及貴顯處鄉族
更謙厚喜讀莊子好鍾王法帖尤酷愛蘭亭及卒以爲殉著
有連城集祀雲南名宦及本邑鄉賢子汝梅定州同知著有

砥硤集

歐陽材字爾英恕之後祖曙燦好義疎財賑穀施襖以年九十

給冠帶材恩貢任盩州學正爲諸生時設帳廣報觀聞應期
彭自新皆受業焉嘗書聯自警云存心有三畏起念惟九思
在任淡泊自甘有卽事卽景入絕傳後子餘慶邑庠

葉世美字濟之璽之孫以歲貢知福建龍巖縣至誠御物民不
忍欺顏其堂曰臨汝著有臨汝堂錄一切地方釐革條議洞
如指掌其禱戒隍除草毒驅虎害及祭文信國諸文尤真誠
剴切又有飛兔草公餘合刻彭自新宋九儀爲之序今皆散
佚子亢宗鳩宗孫宜振俱庠生

張以宗舊名澍字思潔七歲父燦喪苦塊泣血母雙氏曰幼有
至性後未可量延師教之未幾濫報儀賓竭貲始免父故令

江川族或疑其多藏以他人侵隱案陷之入獄慨然曰寸靈
尙在何慮無資盡鬻田宅償母子困守益厲匪文士罔與交
性靜而敏雖詆誶譴浪不廢構思皆自信必售者遂以案首
入泮食餼登萬曆辛卯賢書公車七上中副車者再部取赴
選不欲行母曰吾老矣盍爲祿仕乎乃就安仁教諭謝贄振
乏士論多之卒年五十七

譚炯號念橋力學好古在庠屢試第一鄉闈取中復易者再由
歲貢任浙江杭州訓導識黃汝亨於未遇後黃令進賢遣使
迎之升湖廣鄖西教諭從撫軍李見羅講學多士鄉風尋擢
建昌教授主講明德書院著訓蒙禮集八行圖說學者宗之

解任日士民贈以春泉繹化學行兼修二冊歸而貧甚所居不蔽風雨人共稱之

彭自新字滌之號祖銘進士初授行人卽抗疏請元子冠婚大典一時重其風采尋升刑部郎中出守四川重慶清廉平恕爲寮屬表率時楊酋初定自新爲善後計措置周詳升本省副使以憂去服闋補荆西川南道轉雲南右叅政分守金滄雲龍逆酋段進忠擁兵叛自新計誘擒勦殲渠散脅迤西以平事詳潘一柱彭公平叛碑遷按察使未幾致仕歸天啟癸亥卒於家刻有滇南政績祀鄉賢孫奇發遊庠

宋良輔字效忠自幼玉立力學事嫡母克孝母老晨昏侍立牀下極眷戀之誠處鄰里族黨言笑不苟以歲貢任安遠訓導恪守官箴府縣交薦有卻饋揮金儲書卹匱之語

宋良弼字盡忠少英發在庠屢試高等以恩貢入北監任華亭縣丞政尙慈祥有老佛之稱調衡陽經歷華亭人爲立去思碑抵衡陽當道重其才委署興寧甫兩月士民愛戴一如華亭刻有兩地遺愛記與兄良輔皆側出皆孝於嫡母居鄉和平巽順睦族卹鄰四舉賓筵年七十有三作格言示子孫有忍一言退一步息一怒饒一著之句子繼伊歲貢任經歷繼儒州吏目繼偕繼堯皆邑庠

龍應期字三愷與弟應明應會相友愛四世同居共爨院道旌

其廬應期由歲貢官南安教授造士多方卓然師表應明亦以貢任連州學正應會年七十給冠帶

按舊志爲應會立傳應期應明轉附以見以長以貴皆不合今更正

敖化成以孝義聞父鳳錦享壽百九歲化成侍之如一日母何氏病不解帶者三月餘夜夢神人投藥次日卽愈朝士或勸之仕答以詩曰光陰迅駛去如馳白髮年華未可期捧檄曾聞毛義喜遠遊恐動仲由悲斑衣難向黃扉舞菽水忍將膝下離反哺願終烏鳥愛敢辭微祿謝皋夔由是孝行著聞方伯來額旌之嘗捐修白良橋黃皮尖路萬厯戊子己丑浚饑減價平糶貧不責償族遭回祿出穀以助晚年歲制棺施無告者知縣畢爲文獎之未仕卒

辛可善字龍衢歲貢才學兼優邑名士多出其門知縣姚繼舜方候部咨與遇京邸奇其才到任時加物色從無干謁愈器重及可善殞親臨弔焉嘗購書捐送學宮助樹修丁田橋亦貧士所難者

劉世科字興登邑庠生篤學力行萬厯己丑歲饑親族有乏者悉計周之秋成爭償不受曰以饒濟乏通財義也己酉僉解南糧爲里中貧民墊解八十餘石晚年家落處之泰然生平有犯不校佃戶狎其寬或抗租且加辱焉終舍容之曰一鳴

諸官彼必得罪有私伐其樹者與以金曰持此可市木無窮
我桑土之防卒皆感服焉子泰來斯來游庠

李正芳號心崖孝友善詩文以歲貢就試南都文已入彀因謄
錄誤見抑遂就選官雲南永昌通判攝州郡及督儲理捕事
皆著聲兩以軍功一以積穀蒙賞升陝西寧羌知州致仕歸
恩例晉階四品屢舉鄉飲

楊遇用字汝材邑庠生有異質下筆數千言同邑彭澄張璧咸
器識焉候廩二次俱以服制沮遂絕意進取謂所親曰以一
參蠹糈且困我告我處也因買產易書飛觴延客放浪山水
爲處士問奇探秘者戶外之屨常滿自象緯樂律河洛元禪

萬載縣志

卷二十 人物

二十七

諸書以及醫卜琴奕無不通曉彭張二公每自宦所招之不
就家愈貧而興愈豪最惡言財合郡相知酒肴外無敢致餽
歷任賢尹咸過從以詩文請至舉鄉飲則辭著有芸窗一得
編行世孫一龍遊庠

辛圖猷原名子光號衷抑以舉人兩中副榜進士任永新教諭
萬歷丙午分校廣東取士五人皆名流升廣東大埔知縣以
清潔著逋戶頓輸流離漸復淳調程鄉兩邑俱有甘棠之頌
告養歸獨力建南浦橋垂成復圯或謂石工惰故致此宜罰
金責其成圖猷不可卒傾囊成之自題其柱焉所著咏志詩
盛傳於時子啟夏啟周孫瓊瑤勤學俱邑庠

喻子賢字君實號蘭臺舉人歷知廣東鎮平平遠程鄉縣事以廉能調增城數問疾苦民情悉達遇事迎刃立解戢蠹役無所容奸至有求去者舊苦徵輸加耗悉革去之俾自注簿黠盜誣良痛懲之自經服毒陷人者置不問風俗爲之一變至於去郡蠹抑中使尤人所難一夜夢母病亟請告數日而訃至士民多泣送者服闋邑令倫公勸之起不從因作一聯云風雨一犁農事亟煙霞半畝野心閑其恬趣如此居鄉惡干謁非公不入官府祀鄉賢

參廣東志

鄭邦魁號少谷歲貢任崇仁訓導潔已愛士嘗捐俸爲王士烜完娶併給以膏火士烜後得恩貢劉某有冤獄廉其情爲白

萬載縣志

卷二十八 人物

二十八

縣令昭雪之所著有家居六律忘言篇讀涵養操持論漫賦等詩子從孔隱月臺山刻有月臺山意

鄭邦德號二谷恩貢任浙江縉雲教諭署宣平慶元二邑事有聲升南直隸望江知縣永蘄自守家無長物獨喜詩文著有春草堂集澤田遺稿

參李志

郭維礪字汝成歲貢任贛州訓導矢志清刻前行端嚴友愛兄弟撫孤姪如其子平居惟以孝弟勤儉爲訓

丁守正字永表少負文名由恩貢任南安府訓導歷升雩都教諭蘄州學正窮經忘倦造士多方卒年八十二

袁伯明歲貢任臨江訓導轉廣東和平教諭院道以學優才練

褒之前後署興寧長樂知縣二邑各立去思碑升東昌教授
端方正直無所阿徇士皆慕之

鮑彥聖字名臣庠生少負偉志讀書靜安寺夜歸遇羣巫持火
驅疫問知病者極貧袖金贈之病愈謁謝辭弗見有莊屋住
寧州人樊姓故佃也挾貲物疑而偵之知竊自主家諭之歸
不聽得其主姓名密遣馳報追物歸主願中分以謝卻之其
任俠如此事母以孝聞撫諸姪有恩胸無城府族黨咸樂與
交家計日窘不以介意孜孜力學其題壁聯云天理九分
終是少人心半點卽爲多可想其生平矣子紹湯歲貢任四
川墊江知縣

萬載縣志

卷二十 人物

二十九

張紹渠號鳳陽邑庠生性剛介知縣畢姚咸重之每咨訪利病
多所擘畫值兵興增餉紹渠援嘉靖詔書奔懇當道事雖格
邑人義焉水次倉爲樵蘇要道幽僻有厲爲祟多沒溺之患
渠捐貲建鎮龍庵遂成坦途又請重脩丁田橋倡建畢姚二
公生祠凡在庠五十餘年弟子從游數百人年八十餘卒

郭宏宇字天衢髫齡食餼於庠已得歲貢痛弟宏宿早逝遂不
廷試閱二年始以母命進京選安福訓導見重於少司寇鄒
德泳每會復古堂必相與講學卒於官士紳爭賻之子萬里
選貢姪萬鵬歲貢皆執業於鄒有贈句

喻應魁字文字早失怙恃逢忌日輒悲欲絕髫年遊庠爲文根

祇經史有矯然獨詣之思人爭師事焉每歲饑傾貲賙卹邸
舍有以色相挑者正容拒之自號閒公新昌漆嘉祉爲之贊
屢困鄉闈遂放浪山水吟咏自適或夜分乃還人或慮之曰
虎避正士鬼懷正氣予自信已審何畏也逝時謂其子曰吾
家世忠厚當引之彌長勿斷善根善自當爲惡不可爲非爲
禍福故然禍福畢竟不爽汝曹志之子懋敬天啟舉人長厚
有品參李志

辛應軫字斗垣邑庠生篤學尙義不靳施予子承芳構別業九
仙宮傍延師課子孫劖歲貢生以文名順治間奉文開文墾
荒劖以八難六不可呈縣及司詳免之士魁及曾孫四人俱

萬載縣志

卷二十人物

三十

邑庠參田賦志

楊嘉和字達道器識通敏總卅游庠以歲貢任常州經歷多所
建豎委權稅泚墅清操不染薦擢涿州同知遂歸建步雲志
學二館課子孫及羣族子弟修葺芳坑亭榜山小溪諸橋路
賑粟捐樽不勝紀子德美廩生

辛聯魁號張吾光佐孫舉人任永豐教諭捐建尊經閣有德教
碑擢知徐州城遭水陷撫卹兼至以事件當道調劔州甫三
月流寇竊發備歷艱險謝病歸

一彭之龍字言允髫齡入學以選貢中順天鄉試任陝西商南教
諭不局纖嗇不競浮夸卒於京一時同年友皆痛惜之斂賻

歸其喪

郭汝宣字贊明篤志博學工楷書府道考與弟迭爲冠再登鄉試乙榜以歲貢授職生平事寡母孝待庶母以禮嘗受知邑宰徐一唯從無私謁獨以晏三綱羅非辜代剖訛釋適喪偶三綱願爲婚以報執不可宰聞而媒合焉後宰升任延入幕以母老薦友自代友欲分金酬之不得也母葬所人稱佳城友某謀盜葬其旁弟欲鳴諸官宣曰友旣不義當與分咎今穴未穿幸也以貲補所妄費事遂已常書楹帖曰願留餘巧還造化多積陰功與子孫蓋自敘云

宋治字作明廩監生任廣東海豐縣丞歷署永安長樂三邑誦

其廉明嘗捐俸掩露骸代貧生林某完逋賦又助王某葬父重葺綏戢堂孝廉關仰旒爲之記秩滿將入都以資斧竭蹶遂歸長樂民立去思碑

楊蓁字魁林萬歷歲貢授南直隸休寧訓導未仕卒心粹行端孝友著聞士林重之

孫崇祖號翊存歲貢任建昌訓導升羅定州學正委署西平縣篆不數月治行甚著遷吉安教授西寧人感之有隴寧頌太史韓日纘序以行

辛御良號柏坡淹通經史鄉試文已入選易置副榜者再屬修府志郡守季德甫知其才任以筆削吳焯宋良佐皆師事之

王若昊號文川尚俠好施鄉有反唇鬪墻者必親詣其家爲陳大義及古今孝友事人爲感動歲旱民饑所居李家園近吳楚通衢捐廩設粥全活甚衆有賑荒詩云可歎年荒米若珠嗷嗷飛雁負饑雛此離盡作溝中殍雲漢空勤黼座思就食移民需善政捐貲煮粥敢嗟呼幸延生命秋成日繪獻無勞鄭尹圖嘗戒子孫曰踐土食毛無以報君恩但得早輸公賦無爲逋課頑民足矣子道純庠生孫祚長廩生有文名祚永歲貢生力敦古道繼伯爲嗣孝事唯謹後伯年老生二子家產付丞管理無纖芥私考選教職未任卒祚承子象賢廩生宋九德字士吉工詩文善楷書垂髫食餼以歲貢任萬安訓導

萬載縣志

卷二十八人物

三十二

端躬行勤課會嘗捐修五雲二十里渡頭坑倒橋灣路施棺埋露骸合邑頌德迎養老母定省不輟秩滿升廣西融縣教諭聞母訃捨地泣血遂卒於任遺囑母喪葬祭甚悉不及他事著有五雲三桂齋集

周簞字宗器歲貢雅度循循謁選時海鹽進士沈奎與同寓爲繪圖賦詩以贈修撰茅瓚序之後任永興訓導

鄧繼耀字歧坡爲人忠厚推重鄉評尤好吟咏屢舉鄉飲不就孫文魁廩生文輝亦善詩文

劉芳聲字經邦庠生博學尤精書法年十五就試知縣陳亟拔之在學試輒冠曹以數奇終於一衿弟芳譽著有芸窗蔓稿

楊正英號立吾置書千卷日手一編閑家範族有古法建別業
曰先春館以課子孫屢舉鄉飲不就自銘曰不貴琢磨完璞
玉無貪名譽損形神子道亨庠生動必以正事繼母以孝聞
孫汝相著有先春剩藝

辛明瑚號源泉歲貢修身謹行名節自礪性愛松植之園圃皆
滿嘗有句云栽松不獨來清風其實茹之顏如童前山有苓
能久服往往白日升仙宮亦一時風雅未仕卒

王若棟號槐庭家徒四壁下帷發憤郡試嘗居首顧阨於學使
者遂舍去益肆力古學或游觀山水縱酒賦詩自適由是名
流推重邑中碑銘序記多出其手遺稿惜遭回祿僅存巖壑

萬載縣志

卷二十一 人物

三十三

寸芳詩集

譚嘉材字篤夫少苦讀屢試冠軍萬厯戊午主司孫有祿批其
卷云七藝俱有高人識力臨時易置副車巡撫張贈額曰滄
海遺珠後膺崇禎間歲貢未仕卒嘉材有至性父煉病危親
嘗湯藥衣不解帶者經年撫幼弟嘉士成立知縣倫應祥以
孝友申獎

譚嘉猷字廷獻髫年游泮交游盡名士緣例入監已選兵馬司
官辭不赴性醇厚事繼母以孝聞父病痰癆禱天願促齡代
分產以饒者讓弟在成均同舍生聶迪被盜困甚嘉猷衣食
與同更爲作歸計里中待舉火者甚衆假貸不償輒蠲之家

以是落不悔嘗植蘭數十本謂子曰蘭吾良友襲其馨與之
俱化其志趣如是子經濟資性明敏淹通經史兩中乙榜貢
入京受知繆西谿太史崇禎中知縣韋明傑聘同修志

敖奠華字君賜和厚端凝日以經史課子錄勉學詩於壁曰三
年郡國上賢書磨礪豈長困草廬陳義直須追大雅空羣端
見重公車鋒鏃新發吳鈞利節目終看社櫟疎少壯清時俱
不偶春風切莫負吹噓撥學田竹山爲子孫讀書費又割產
資外甥張日嘉膏火甥後膺選貢從弟奠忠年老無嗣爲再
娶生子翔入縣學外祖父母及妻父母葬皆獨任之捐建煙
包西江易公埧黃田江暫亭橋梁凡五所又修東岳祠海雲

萬載縣志

卷二十 人物

三十四

古刹可謂好行其德者子獨占庠生孫連舉人璿郡庠

彭汪邑庠生七歲能讀春秋輯有春秋細講註述子應輝由例
監任山東平原主簿改南直隸潛山丞委查縣倉庫能清六
弊當道薦之升烏蒙經歷未任歸

常大用字行甫潛心博學郡守鄭惇典奇之拔冠五學投合甚
懽大用絕不干以私益見重泰昌改元以恩貢赴廷試逾期
禮部特疏補試時年七十有四選撫州教授升石首知縣著
有易講子史粹語

龍兆禎號退庵儀之孫歲貢生監試第一選廣西雒容知縣雒
屬要衝猺獍雜處盜賊不時竊發兆禎修城設哨造軍器以

備禦捐俸墾荒積穀備賑輕贖草羨民賴以安葺衙署學校
自爲之記造士尤勤首取龍偕穆連捷春榜文風以振院司
交章薦之北上道卒孫紀官庠生

彭貞古字嗣惠家徒四壁苦讀不輟以恩貢入監屢試高等性
慈愛喜放生書法酷嗜右軍及米海嶽二家人得其真草皆
寶藏之邑中祠宇楹聯多出其手與副使張璧先後齊稱

宋繼芳號式龍例監任浙江鄞縣主簿轉延平衛經歷居官清
苦如寒士以祖允恭耄齡奉養唯謹遂不復出子希夔庠生

彭簪古號子纓年十三遊庠攻文之暇喜談兵法習弓馬天啟
壬戌赴京適兵部選將材因就試授京營把總奉撥煉火器

萬載縣志

卷二十 人物

三十五

教習先鋒甲子實授守備運礮駐守山海關逾年調守關外
以功累升叅將丁卯擢副總兵爲同官所忌坐饑軍譟變死
督師袁憫其冤給勘合送柩還

彭希旦字立元先世運漕遭劫傾產以償家遂困且孝友力學
二親三弟悉資館穀以贍督學查獎以色養因心給學租三
石優異焉以歲貢終家風嚴謹子姓憚之子時科廩生

汪觀字集珍爲府吏崇禎丁丑楚寇攻袁城造雲梯觀夜縋城
下奪之寇遂退戊寅詔舉將才郡守解經達以觀應授欽依
守備管安福營兼攝二妃廟管官三載以養親告歸癸未竊
寇破城知縣月中桂請兵會勦委觀運糧作鄉導事平上聞

復職以母年九十餘不就

王試勳字銘常父鼎相邑增生構書舍廣報觀左課督最嚴試勳由歲貢任都昌訓導課士有方升河南息縣教諭值張獻忠亂率諸生防守龍門有功經畧楊嗣昌委署新蔡篆愷悌爲政士民德之子偉邑庠生

李棟字若木舉人有孝行篤友誼築屋貯書訓族子弟周貧濟困著有節山遺稿采李志註補

張列文廩生崇禎癸未賊破城獲列文強之入山不屈遇害子經庠生聞父難奮身格賊亦死之時監軍道巢贈聯有盡孝盡忠是父是子語崇祀忠義孝悌祠

人物下

國朝

辛敏芳字文馥幼穎異能文年十二或以田土細故訟其父明
韜值父游金陵芳代質邑令韋奇之試以文援筆立就因切
責訟者置牘不問旋游泮食餼順治丁亥奇荒多方拯濟見
露骸輒瘞焉高令鵬起聞其賢欲見之守道不往因贈匾曰
今之子羽生平藏書甚多皆手自校正欲建萬卷樓會卒

譚嘉棟字隆卿邑增生父德光爲縣吏以純樸稱棟性篤厚學
務主敬讀書必盥手然後展卷母病躬侍湯藥廢寢食者浹
旬丁亥荒施粥賑濟存活者衆舉鄉飲不赴嘗作功過錄五

萬載縣志

卷二十 人物下

一

思箴以自警易簣時猶屬子孫力行之子經國有傳經泰十
四游庠督學張京元評爲曠代逸才孫儔任登仕俱邑庠

宋良璜字無爲穎異有豪氣爲文博觀約取出經入史驅役秦
漢唐宋大家左右逢源衡鑒十不失一邑推文章尺子得子
晚義方最嚴每讀書作文一言稍窒撻之流血年七旬猶與
試學使趙拔一等稱爲老相知又稱一家相知蓋是年長子
繼種冠軍得恩貢次子繼桂優等季子繼穉首取入泮故云
然其律身一以古賢爲歸危坐竟日無跛踣之容方正嚴毅
其天性也卒年八十五繼種有傳

王事字惟勤丁亥奇荒煮粥濟饑重建石亭木橋助三元殿基

嘗路拾遺金坐以待遺構書舍太和觀篤志教子年八十六卒子言字文人磊落淵博垂髫遊庠奉繼母以孝著教育幼弟甚摯後學多所造就康熙十五年學使邵取准入貢適寇氛正熾未獲領咨士林惜之言弟京立邑庠

辛映斗字鼎卿幼孤依母甘氏成立年二十念無以爲養棄經生業充布政司西通吏以勤敏練達給冠帶每念瑞袁浮糧積困在民欲紓之而未有路適藩憲莊僉憲安入覲

世祖章皇帝諭陳地方利弊斗隨行卽以是請兩憲隨疏以聞部議取勘元明籍而兵燹後徵冊無存所據獨志院駁詰再三乃援鄰郡科則比較申詳始得題奉

萬載縣志

卷二十 人物下

二

恩旨減銀萬七千有奇三百年民困頓魁斗之力也是役也斗獨捐勾當費三百金人無知者迄今子孫蕃盛立專祠科貢不絕袁端號靜齋歲貢生博學好古善詩文與宜春易嗣重梁佳植何山梁巨植本邑周顯輩讀書郡城以力挽文風爲已任士多師之屢試中副車子琳廩生宗璜邑庠

郭萬象號鼎梅性好善嘗修花橋橋遇荒施棺粥濟貧乏有鬻妻子者代之贖順治十三年率子士選士達士逢捐金五百有奇重修 聖廟事報院部春秋永頌胙焉知縣梁大年額獎之卒年八十三士選字簡在性誠慤與二弟讀書飲石齋年逾七十手不釋卷以明經終士達廩生士逢附生孫庠生

邦泰乾隆乙丑歲饑經理賑荒全活甚衆京邦佐俱游庠
宋繼種字生胤號育川就傅期月輒誦數萬言父良璜見其聰
穎督責愈備一切古文詞無不通曉在庠屢試冠軍途間命
題行文一里一藝歸錄而成帙焉順治中以恩貢肄業成均
數爲名公卿所器洎登賢書人或勸之仕曰予性拙不能曲
腰折項事上官願成一進士副家君望足矣歷六科僅中明
通榜遂不出清操自持義不苟取嘗教諸子曰君子檢身涉
世須懷匹夫匹婦一能勝予之心予閱人多矣未見驕肆不
倫能久遠者爾曹戒之康熙戊午大饑倡衆領官銀親涉波
濤挽粟以濟卒時邑令常親臨其喪謂有古君子風所著四
書經史摘証梓行子希稟庠生希陳有傳

譚經國字定之博學有幹才由歲貢授樂安訓導甫入境城爲
寇陷知府陳洪諫委署崇仁學與知縣陸呈祥共嚴城守寇
不敢窺和碩安親王賜以袍加紀錄焉次年署東鄉學寇圍
城幾一載兵少糧乏文武皆議出避經國力主守城獲全士
民頌功紀石至樂安城復乃涖本任繕城葺學荒絕絕建義
倉詳編審立儒戶多所建明有媒孽影射者爲力雪保全甚
衆督學邵稱其行不愧古學不愧師云子任登仕俱庠生
汪中元字一仙家貧無師偕兄弟十餘人講習善垂書屋有疑
質之伯父相度季父叔度遂豁然有得學使侯峒曾以奇古

贍博日其文與何山袁繼梓周顯輩交遊及門甚衆所得束脩悉供甘旨毫無私積由歲貢考選學職未任卒

辛金貴字玉友父奇策庠生急公濟貧借貸不計利嘗拾劉德九遺金卽還之建且息亭於楊公嶺設茶飲行人修半升米冲石橋舉鄉飲金貴其長子也篤學勵行以康熙歲貢任德興訓導時土寇兩次陷城偕知縣凌希聖曲諭招撫寇感其誠皆投戈泣服饒南九道李芳春甚器重焉委詣各鄉清查荒熟尺寸不遺民困得甦士有貧者時出俸賑給之嘗寓書教諸子曰忠厚所以持身輸將所以報國長子汝礪邑庠生天性醇樸非公不履公庭卒年八十六子孫二廩生六人在

庠次汝梅另有傳

敖連字宗玉少孤刻勵自立喜愠不形事伯叔父愛敬兼至鄉鄰有急亟周之稱貸不責償康熙甲寅寇擄民間婦女連爲贖回完聚甚衆由舉人官瑞昌教諭月課諸生捐俸給酒食優者旌之士多感頌子有仁有義有智俱庠生孫化龍武舉楊勲字克成歲貢少孤事母以孝聞居鄉排難解紛人咸推長者堪輿吳獻吉壤故鄰湯某荒山勲憫湯無子使自用之吳愠甚勲曰此人倘有後吾心快卽受賜矣甲寅寇變擄殺甚衆勲挈家屬蹈危險卒無恙人謂天祐堂姪二寇害其一又擄其季乃設法贖回續弟後總鎮趙督兵勲寇勲先輸穀草

懇給招撫文於是逃者漸復勲皆保護安全之選奉新訓導以疾辭卒年八十二與妻歐陽氏生歿年月皆同亦異事云子三名廩生善歲貢任饒州訓導淹通經籍士慶得師言舉人孝友謙恭教家有法

參府志

袁秉星字宿也庠生有文行順治甲午鄉闈倖得而失父早歿事寡母孝忍讓少弟撫孤姪如子爲人排解傾囊不惜鄰里空乏賑助惟恐不至康熙甲寅兵變副將陳素綸聞其名諮以方畧給令牌俾安輯地方團集有法寇不敢入其境好獎誘人才開館延師教親族子弟會課優者給紙筆膏火競勸於學卒年八十七子則旦師亮庠生亮有修竹遺草孫建中

萬載縣志

卷二十 人物下

五

寬有傳建鼎文庠曾孫廷鼈舉人

李國幹字汝翼愿樸多隱德甲寅之亂寇擄婦女數十寬其家令主守幹乘寇出悉縱之已亦逃寇焚其廬教弟成名不辭勞悴年九十卒子爲文孫世秀世勲文庠舉人承烜其後也彭璧字秦求穎異多豪舉十三游庠甲寅寇變率族弟贊入練兵扞禦知縣吳深倚之嘗控免族中虛賠錢糧及本邑尾欠部費災傷火耗後以歲貢官南昌訓導勸課有方縉紳多出其門同寅何觀國歿爲營辦歸葬年七十七卒尙書熊一灝爲之傳子超邑庠孫元仁廩生元灝明煥元信俱在庠

郭士佩字公瑜父一級庠生見人危急與古蹟頽壞者不惜傾

曩振修之士佩性謙謹無機械卽盛怒不出惡言父歿友愛幼弟數十年無間以歲貢任清江訓導自奉淡薄訓士以力學敦品子邦升郡庠孫鍾秀有傳曾孫洪武舉

宋希賢字象之少孤事繼母曲盡孝道讀書日數千言康熙舉人戊辰會試房考王之樞呈薦數次以一場微疵見擯任清江教諭獎勵廉隅克振士習巡撫白捐修清江長堤命董其役異以刑杖賢至誠開諭不事扑責未朞告成巡撫旌以金帛子啟泌廩生啟洙邑庠

高捷字得先父廷祐嘗路拾盧達遺金坐待還之有捕獲盜牛者欲溺諸水力阻得活舉鄉飲不就年八十五卒三子俱游

庠捷孝友力學不倦立品醇粹有先民典型爲文力振衰靡好深湛之思每有所得雖半夜必起告其門人剖析無贖義故門下多知名士以歲貢終年六十八臨終手摩姪頂而屬其子曰爾伯父早逝無後叔止遺此孱弱兒其善撫之子涕泣受命推愛甚至子愈謙另有傳孫岱峻文庠

龍文炳字嘉猷歲貢祖兆璜內行克脩以利物濟人爲念善堪輿尤精岐黃術鄉里沈疴多應手痊舉鄉飲父星舉人課炳最篤炳博見洽聞嚴正不阿端人碩士樂與交邑中大事依炳爲可否官安遠訓導以正學爲多士倡有賄舉孝行節婦者皆力拒之平生著作甚富所作詩記安遠人爲刻石

宋希陳字東尹繼種次子少承家學繼從處士熊頤談經問皂
山盡得其奧旁及山經地志浮屠黃老書射算法琴棋畫繪
之類無所不通肄業豫章書院受知巡撫宋犖知府胡應麟
延爲昌黎山長旋雋鄉闈計偕留京名籍甚宋太史至視學
兩浙聘同衡文晉撫諾粵東道楊並命子弟師事焉歸里從
游日衆因材施教諄諄提命不倦多顯達者作文務臻理奧
洗盡時習囂塵態而出之若不經意嘗戲以寸香角捷香未
竟一藝立就彌復超拔可喜終不第識者深惜之著述自若
易簣時猶口占二聯以長吉自命生平孝友肫摯舉動遵家
禮事繼母色養兼隆撫弟姪甚有恩著有四書講義作文譜
漆紹文銘其墓子啟穀孫嘉鴈俱郡庠

彭元升字彥伯舉人小字外少穎敏過日成誦童年隨師賀巨
室聯句盈庭歸詢之隻字不遺聞者駭服遂有外夫子稱爲
文下筆如飛而曲邃雋永耐人諷咏中後愈折節讀書閉戶
猴腦山三年學益富著有燕石集太史潘述祖評而序之

巢廷魁字克占舉人少穎異以冠軍入泮食餼嗜學益堅與辛
聯昌彭元升等相鼓勵知府葛繼孔觀風取冠多士延爲子
師署內陶思淵與通款洽朝夕談經史講理法并出文稿就
正摘抉精當陶深服之後陶聯捷入詞林亦切磋之力云子

起業庠生

辛聯昌字殿開舉人性孝友父病篤刲左股雜他肉進病遂瘳少弟早世與人言嗚咽不能出聲接物和易然遇不平事侃侃無所瞻顧刻苦讀書經指授者率有聲所得館穀置產分給諸弟喜作文雋逸疎爽曲透物情成一家言知縣施昭廷重之日相談論未嘗以私干

以上本舊志略加裁節

張明德字本初號橋亭舉人考取內閣中書性端嚴不隨俗趨讀書必鑰戶爲文苦思冥搜咬髭鬚指甲殆盡掃絕陳言力追古作者康熙辛丑試禮部有賦以關節者怫然曰吾文自當售且進身詎容苟乎卒下第作詩百餘篇寄其友死於逆

萬載縣志

卷二十 人物下

八

旅著有齊治通書藏於家

府志

辛金澄字三登邑廩生幼穎異爲文精悍力矯浮華詩古文根據經史雄渾奧博邑宰吳自肅得其試卷大喜旋爲督學邵識拔爲人淡泊寡營矜然諾不爭外飾與同志宋希陳龍文炳及弟金衍文行共勵名其社曰兼修辨論學業洞析奧窔希陳稱其待友誠待戚和蓄僮僕義謂古拙自愛如夏鼎商彝令人不敢褻視易簣時遺令勉內外孝友戒用僧道衣被從儉約卒年五十一子汝獻別有傳以曾孫從益貴 地贈

資政大夫

以下新輯間府志

辛汝獻字古才拔貢少失怙恃孑身持喪如禮事太母劉與繼

母高咸得歡心具養甘旨必豐已茹菜而已爲文溫醇雅潔日可得二十藝學務實不近名同輩有聯名誇聲氣者淡然不屑也邑公事隨力贊襄尤急於宗支再從弟某世單丁不能自存爲之婚者再從叔某老無子膳養終其身乾隆乙丑任湖口教諭初謁廟見崇聖祠在禮門外請於巡道李根雲議更修并修殿廡明倫堂如式邑進士某以小故戚屬與訟尺書喻之和好如初生員某某兄弟爭產母溺愛弟以不孝許其兄開以至性感感泣拜而去先是卜修文廟既得日有言不利於司鐸者笑而不應竟卒於任年七十一以孫從益貴 累贈資政大夫

辛金鑑字又章歲貢勤學問敦本實嘗自作家規朔望集子姪聽講任石城教諭捐俸倡建義學士子以文謁者批閱不倦士甚服之卒於官爲立主祀義學中 府志

郭岡字鳳梧拔貢生以官學教習期滿選江蘇泰興知縣在任興學校立社倉丈沙田賑水灾善政甚多其聽斷聰察而平恕邑紳梅有僕被殺未得主名岡往驗畢微視捧茶者形色有異立命械之至署一鞠而服不累一人治地近監販私與緝私格鬥人頗衆岡聞報會營馳往擒之訊無辜者立釋以十三人上撫軍欲以逆論岡爲請命者七不得已躬叩鈴轅請曰愚民何敢爲逆忤積習迫饑寒又不知王法故出此皆

職教養無素陷之死地也請先題奏以塞罪狀撫軍改容謝焉竟從輕比委賑實應水災預飭保甲註冊令自標饑民字於門親詣查勘按戶散給無冒領亦無漏澤調華亭革鹽當陋規清釐積案華亭濱海二濠東鹽場西民居皆官地商以東有水患請於上憲西徙岡因其病民反覆申詳者二十餘次事卒止民咸德焉卒於官適倉穀霉變士民爲呈郡代補并贖以歸子開英舉人另有傳

楊維鑑字希古歲貢幼孤力學喜作詩古文詞尤工八分書授長寧訓導教士有法所著有四書理解學使湯聘爲之序又著田寮文集八卷知縣江元璫甚稱之

參府志

萬載縣志

卷二十一

人物下

十

辛顯字景淳號道崖舉人自幼醇謹比長恪守程子四箴聞朋聚戲言輒掩耳疾走率諸弟肄業學舍月三四歸省父炳文有氣喘疾顯負行堂廡率爲常體素孱父母恐攻苦太過常靳其膏油顯竊私益之夜分達旦不寢富兀坐沈思時儻若無覩或竊其几案間物弗覺也鄉捷後越五年卒

參府志

王家塾監生家饒好行其德嘗捐貲立茶山義塚又置渡高城買田爲經久計乾隆癸亥荒傾儲粟百餘石賑饑者復出貲倡平糶施綿衣千襲助修文廟及文明塔創高城社倉并捐以穀布政湯旌其廬

府志

辛繼舉字達侯歲貢有孝行爲諸生日常過市汲水養親嗜古

力學持已端肅尤嚴義利辨人有非行不敢令之知讀書馬
腦山房三十餘年間以詩酒自娛著有性理體要蒼崖草學
者稱蒼崖先生子廷芝舉人另有傳

蔡府志

聞成忠庠生父老失明侍養不離左右從兄泰齡絕嗣爲立後
置產又捐貲爲族子娶婦乾隆癸亥庚午間穀價騰踊者三
忠捐金凡二百餘贍族黨貧者嘗建昌橋石橋及竹渡浮橋
踰千金并置贍渡田卒之日聚諸負金者焚其券

府志

辛聯居早孤母王氏中年得瘋疾兩手不仁居無兄弟妻室赤
貧賣卜以養多奇中過午不卜或樵或釣歸必爲母盥櫛凡
起居飲食及浣濯埽除必身親之服養三十餘年未嘗少懈

萬載縣志

卷二十 人物下

十一

府志

辛金峒孝事所後母母病危割左肱肉進之愈餘詳藝文孝子
傳

按辛明經所作傳不及割肱事蓋爾時請 旌有所諱避
恐傷生也今功令寬矣據實補之

宋啟封字孟侯監生幼出繼事父能孝父卒哀毀不異所生念
不得事繼母延丹青圖以供奉嘗置田已孑值後知其人與
父有故即還田讓其值遇賑饑及大興作皆樂成之邑推爲
長者

府志

龍世嶽字維智性篤摯有幹局康熙間兵亂母及弟被擄北去

數歲有傳其母死者遙望痛哭曰生不能養死不能歸其骨
何以子爲乃盡鬻產間關至都門徧訪無耗禱於許旌陽祠
聲淚俱下一人過而怪之語之故則其弟也引至寓所母主
在焉二弟自外入愕然問故始相持而哭諸弟各受室不能
脫籍乃獨負骨歸隱衣裝中飲食必虔祝比至家大會戚友
葬祭如禮孫鳳祥舉人另有傳以下俱新輯

龍學宏字士魁庠生慷慨好義常爲故家子某完娶鄰郡僑居
儲某負債欲出妻宏代償使全且周卹之佃有逋租鬻媳者
宏聞之慰曰若無然吾豁若租佃媳亦完先是學產多被侵
蝕宏與郭邦藩上控清查爲當事所忌欲致之死學使李廉

得其狀庇護以免雍正甲辰丙午學租入薄不足贖鄉試宏
賣已田給之家遂落子孔彥字俊仲十歲應試稱神童知縣
許拔置第一學使姚有精深博大之目在學六十五年屢薦
不售以年老 恩賜舉人

郭邦藩字宗臣歲貢生有幹材邑中利害獨任不疑學田久被
侵蝕邀同事控淮清查藩按冊稽勘隱占無所遁雍正九年
部檄補丈報墾復請於汪侯徧勘荒确以難墾力稟院司得
仍舊邑賴以安任崇仁訓導善誘人材以文謁者多所成就
至今傳頌焉

高愈謙字益贊號遜齋歲貢生任新喻訓導課士有方家素封

好義憐從弟貧與田三十二畝爲贍雍正間與龍言各捐金五百倡脩丁田石橋又立興江兩渡船捐貲置產歲脩備直取給焉屢舉鄉飲卒年八十二子嶠附貢生嘗捐金六百移建學宮孫秉鈞捐穀四百石助賑得議敘可謂世載其德者曾孫湘文有傳

郭鍾秀字挺文號巍山武解元父邦升庠生喜吟咏書取法懷素嘗助田爲戚節婦建坊其訓家云受人欺者非辱令人畏者非福秀性溫厚識力超卓邑中大事如乞免升科清理學基攻訐冒籍皆不辭勞動倡修康樂福壽二橋遺德在人子洪字九疇武魁負性磊落以學基事未竟復與汪朝祖終其

事卒成父志孫大賚另有傳大猷甲辰歲饑與陳池鳳勸捐平糶全活者衆又倡建合族義塾大鼎大呂俱文庠曾孫鳳魁英鳳舒並以武舉官城守元孫光騰武舉

龍長蕃字嘉言歲貢生幼孤勤學居常嚴恪無慢容遇事多卓識喜誘掖後進訓導玉山課士勤懇無異居家時解組歸知縣朱崧舉鄉飲子學川亦歲貢家貧好善嘗節學俸廿餘金給澄渡船費晚年選餘干訓導未任卒

袁建中詳藝文墓志子廷鳳由四川奉節典史升冕寧縣丞創救生船漏澤園卓有政聲廷鼈有傳

袁寬字繼安廩生英敏好學磊落不羣喜藏書流覽甚速爲文

暢所欲言浩氣流轉建桂林書院延名師訓迪來學與同志
議建文塔於鄉事中阻因購基俟邑中公事就商者坐常滿
邑乘崇文堰諸役皆身與其間病革時猶以堰工未竣爲念
得年僅四十五曾孫開慶有傳

王嗣立號銀山舉人家貧力學有文名知縣嚴在昌聘主龍山
講席多所造就時院中膏火不給慨然出館俸助之諸生勒
碑紀其事

汪朝祖詳藝文墓志曾孫元英有傳

辛汝勳字翼侯性聰慧肆力詩古文詞兼工行草求詩與字者
日踵門勳口吟手揮落筆飛騰才思敏捷流輩罕有及者以

萬載縣志

卷二十 人物下

十四

拔貢選宜黃教諭端已訓課多士傾服數年告歸著有丹崖
集藏家

張崇德字柔嘉拔貢生任南城訓導甫蒞任見 聖廟兩廡傾
圯捐貲修葺復築數椽學宮右爲諸生講習所賴陶成者甚
多今遺跡尙存

辛琿字璵璠善居積勇於義行卹孤賑饑亶亶不倦任杭州稅
大使清署基建公廨兩解京餉題辦北新鈔關事蠹弊皆絕
爲沈春源等請減科稅商人爲立惠商碑洎告歸爲善益力
四舉鄉飲年八十三卒子衢例授州吏目性伉爽義聲四溢
邑議修學博士齟齬不可衢商首事召匠立撤舊寢役遂舉

承父志修龍江石橋糜金累萬制軍高嘉之檄縣請議敘固辭不受又修虎塘王家山橋家以好義故田產幾盡終不悔孫炳喬有傳

汪有燦字繼明廩貢生候選訓導風度卓越有學識嘗出已田爲堂兄立後邑有興作及賑卹不惜傾囊倡崇文壇築復圯偕同志修復捐金二百有奇耄年尤切觀光壬午乙酉

純皇帝南巡兩次獻詩賦

恩賜銀牌綵緞黃衣精光奕奕爲一時人瑞

劉大瞳字東上邑增生樂善好施修丁家橋捐金數百爲倡前後獨建石橋四甃道路不計大埤腦有古墳鄉某利其無主

萬載縣志

卷二十一 人物下

五

欲毀爲屋基瞳力止之里人有貧出妻者予以貲得復全又助修文廟年七十卒孫馨蘭曾孫英俱武舉

聞儀字百干邑庠生莊重寡言笑以利濟爲心竹渡橋圯行厄於渡思獨力修復而財不逮因偕牟村辛金壽於古橋下游合力捐建計金萬餘視舊制加擴焉

周繼德自祖爰試分產讓肥父志垣與叔父志翰合產無間至繼德克承前志長幼百餘口同居共爨延及六世家規整肅子姪各有本業每食內外設廣席尊卑序坐未十歲者另設小席亦分序列相揖讓有一未至俱不先食乾隆五十年題旌建坊祀爰試忠義孝悌祠舉人樹贊其後也

辛金壽字天賜慈祥好義乾隆間偕聞儀修竹渡石橋偕姪家松兩修牟村大橋獨建店前潯陽橋癸亥歲歉出穀數百石貸貧者不責償壬申乙酉屢減價平糶歲施棺木棉衣無數紫蓋庵洪塘庵皆割產助香火爲族長捐買屋基擴宗祠倡族糶公米生平捐金粟不下數千舉鄉飲年八十六卒以子家柱急公 贈儒林郎孫以真官典史

辛家松字煥榮捐職州同善事寡母好義與金壽同如葺竹潭橋工歲施絮襖倡本支平糶所費皆不貲牟村橋兩修後道光二年復決松孫秉文等出金二千餘承志繕完焉子樹橋郡庠樹綸官縣丞孫從雲邑庠

李啟華字紹尹郡庠生以方正見重鄉里時周窘乏或借貸不償卽焚券聞鄉人黃某貧將鬻妻給銀穀贍之遂止又捐腴田百餘畝爲族祠祭資將建青溪橋以通要路會病卒子貢生泰洵卒成之計費千餘金曾孫宗彝舉人

楊維鏞字金奏少負才名勇於爲義嘗捐田十六畝助龍河膏火甃近城道路倡修龍河浮橋子之洵有父風歲饑偕同志買穀以濟倡建文昌閣筦理學事備矢公慎偶因公事貸多金鬻私產以償合學頌之次叔度以孝聞性和而介讀書自娛非其人不交與之洵朝夕怡怡構書室延師課子弟凡邑公事非關學校不與聞考棚賓與勸輸有力焉年八十五卒

郭邦城字宗國邑庠生性端嚴然諾不欺邑有興作如遷建
文廟修文昌閣築崇文堰多倚賴之乙酉歲饑倡捐平糶在
宗族則倡建義塾助支祖祀產又捐田爲族人立後教諭趙
由義稱爲好德不倦孫定基附生曾孫有勲武舉

汪發楫字濟川爲名諸生具才識勇於爲義建文廟遷書院皆
身任其事筦學事多年嚴杜冒籍跨考弊至鬻己產償訟費
合學稱之居涂泉與辛廷芝詩酒往來嘗偕李榮陞遊廬山
附糧艘入都到處題咏著有鷺峯詩草藏於家

郭治清字季淑邑增生出嗣叔父事所後節母孝養備至爲呈
請建坊敦品積學合庠羣倚爲重時邑諸廢未舉如 文廟

書院崇文堰建徙修築事宜悉治清邀同志倡督之常公講
堂圯復偕貢生辛汝岐捐建學宮右家非素豐而勇於爲義
知府陳廷枚額獎焉子先植廩生光笏歲貢有傳

鄧鉉字振永優增生博學有才識尤慷慨好義乾隆十八年捐
百金倡建 文廟三十二年助修

上諭亭迄崇文堰工遷建吳公講堂重新城隍廟修花塘橋皆捐
金爲倡巡撫吳查丈檄下意在調劑瘠壤邑中田則歸一久
已相安查丈事旣紛擾科則一更且有溢額慮鉉集紳耆呈
縣府申詳得免性好梅嘗做芥子園梅譜寫之筆意工妙自
序梅花十景詩傳世子斯淑文庠

周繼盛字景中庠生醇謹厚重居家孝友內外整肅承筭學事公慎自矢乾隆初遷建學宮鉅細經理不辭勞勩工竣後捐田三百七十把爲贍學費又捐田百把助書院膏火子南歲貢選新建訓導未任卒

王都亭字正萬號兩山舉人父三顧增生叔父三掄歲貢並修行明經相師友訓子弟嚴毫昆季九人同列黌序時稱九萬齊飛毫尤傑出焉爲文廉悍得力柳州半山詩歌抒寫性靈機趣洋溢生平博極羣書經史外旁及醫術地理靡不通勇於爲義倡建文廟振興宗族有足多者孫廷輝文庠

王都建字封萬都毫弟歲貢生品端學邃邑令嚴在昌學博魯鴻並器重之擇董學事建文廟移書院減童試卷價興鄉會贖費請改折兵米皆著成勞年登耄耋兩舉鄉飲子昌期廩生昌仁有傳昌義歲貢昌信昌命俱文庠

王都會字同萬都毫弟郡增生篤行孝友洞達機宜縣公事恒倚成邑侯張深重之造廬修敬語不涉私嘗倡復龍河浮橋並募貲置產爲修葺計見中丞陳榕門序後辛衢建石橋於下產遂歸吳公講堂子介眉歲貢辨義持正同輩欽重孫廷幹廩生

巢起岐字天作號西堂書籍淹博尤邃於易貌魁偉健啖有勇力縣府文武並試適學使先試武童遂入泮中鄉榜官淮安

衛干總署大河衛守備生平放情詩酒閒臨古帖談吐風雅見者不知爲武列也袁鴻臚芳松嘗延課其子著有西堂詩草

辛廷芝字秀圃號晚堂舉人善詩古文詞書法亦工邑子弟多所裁成地方大事如移建學宮修郡志皆倚爲主裁任金谿教諭勤於牖迪以就試無館舍貲倡建之迨歸老諸生奉衣繖祖行題曰世範人師著有周易四書解作文譜詩文草待梓子士晉歲貢 恩賜舉人孫徽汪洋俱文庠

辛汝岐號敬亭歲貢生性醇謹不妄交游知縣楊長佐雅重之勸之仕答曰教官亦宜勤職姑守吾疎慵家頗裕柴田福壽

萬載縣志

卷二十 人物下

十九

橋圯獨力修復行者便之遷建 文廟常公講堂皆出百金助又割田四畝助吳公講堂

郭吉字敬勝監生性謹敏喜讀通鑑與人論列得失暨不竭以陶朱術起家勇於爲義凡造橋登路捐助不吝尤惓惓於學校歿時以囑諸子厥後葺 崇聖祠助賓興費義塾膏火計二千餘金皆其志也大吏以名上 旌如例子如棠如崧俱武科如崧官衛守備於台州減徵糧價民德之於濟寧值教匪亂後招撫流亡給賑有法爲上官所稱如泰有傳孫郭用中壬林俱文庠曾孫春熙舉人

劉景賜字定翰監生天性純篤幼孤貧採薪養母以孝聞積勤

致富慷慨好施每歲暮察鄉鄰乏食者予以穀不取值凡邑中義舉如置渡施棺諸局莫不與郡守張五緯額獎焉易簣時以義行勛諸子後子崑捐金千餘建郡院試棚迨寶興起諸孫捐田四十餘畝皆承遺志云季子時耕見藝文傳曾孫文毅舉人

龍雲飛字在遠號翥軒聰穎力學從楊維鑑游嘗終夜不寢師見其體弱頻戒之不少止入泮時三試皆第一乾隆庚午舉於鄉名噪甚下第歸旋卒年甫二十八人咸惜之

巢起崙號滙堂由拔貢中副榜選金谿教諭以病沮學深博尤精宋儒家言而胥次卓犖人樂親之邑宦達多出其門素不

萬載縣志

卷二十

人物下

三

輕與外事然如遷建 文廟吳公講堂一時興作咸倚重焉著有滙堂文稿子飛鵬文庠孫象彰舉人

李榮陞詳藝文墓志其著作未舉者尙有滇南花卉記沅江三錄子光宰光宣光宸皆文庠三子光宁監生古道自持精形家言兼通六法年逾七旬與修邑志諸圖皆其手定孫效槐效森文庠烈臣武舉

龍鳳祥字文彩號順齋穎異讀書麴腦山房經史子集略皆流覽而不屑爲章句學詩古文詞悉有逸氣與同邑李進士齊名一以學力一以天資書法見重邑人旁工篆刻由舉人官雲南知縣敘緬甸解餉功擢知賓川州尋因運銅舟覆墨吏

議卒於伊犁著述散佚僅郵夢禪詩話梓行

張焜圭字輯瑞明德子拔貢以文名方樸山謂似李石臺晚年詣益遠直入章羅室邑人爭先就正悉有法度其學以盡心養性爲要嘗曰言行循天良勿務穿鑿便是良知良能許大事業俱可行所無事和友云歲月消磨仍故我性情怡養見真吾可想其梗概邑有善舉每贊成之而不身與其間餘詳墓志子作翰歲貢

周曰樛字啟之讀書敏慧有過目不忘之稱作文有規矩鄉中髦士多從之游以歲貢任鉛山訓導與諸生講明經義勤心月課文風爲振見學宮兩廡頽敗捐貲倡建鉛人頌之解組歸出館穀捐修祠宇不干外事比卒惟以力學囑子孫

宋嘉麟字鴻作庠生孝友出天性家無儋石事父母菽水盡歡親歿兄弟五人分謀衣食每臘歸必歡聚祠內購薪作食促坐合尊風侵敗絮歡逾洽新正乃散幾忘各有室也撫軍吳紹詩以世誼故欲賜之辭友人爲構松莊以居日事著述脩然物外善誘後進及門多所成就

喻士標字名魁監生乾隆間任安徽歙縣丞委解甘餉大吏稔其能檄攝邑篆政治有聲告病歸捐金三百二十助建學宮四百餘金倡建蓮溪南園石橋乙酉饑復出金百餘減價平

糶年八十一卒

郭如岡字鎮南郡庠生事繼母以孝聞喜交文士通人緩急無少吝乾隆乙酉甲辰大饑捐倡平糶凡邑公事如 崇聖祠鄰縣試棚迴瀾萬歲等橋前後捐輸不下千金族構義塾復捐五百爲僮又出貲奉其祖配享始祖廟支祠祀產有典賣者爲捐贖回族姪開英留京贍其家十餘載英挑發陝西時郵金爲旅費家庭中讓肥分磽嘗以義行訓子孫次子樹藻庠生四子樹芝附貢捐建文昌宮居九家之二又捐助賓興俱克承其志云孫爾元文庠

辛樹人字民安幼英確試輒前茅嘗受知縣尹嚴季傳試藝傳播李進士厚岡見而慕之適入城壽其舅張客且闌屏營門

外曰吾待晤辛君也欽遲不至悵然久之隨父汝獻湖口任所師友如名進士黃椿榮曹天瑾周仁棟爭愛重之邑教諭魯鴻得其文詫爲縣所僅見年近艾始補諸生已而引例貢成均非其意也始其父督望勤至自維兩弟列官牆父皆及見而已獨後卒時遺命斂以藍衫將服以見先人至性過人於所生造次不忘生辰茹蔬果未嘗受觴酌風尚節儉家稍豐被服仍布素或以華美進曰吾非不辦此然先人所未嘗服也吾何安乎先是父汝獻以再從某支將絕嘗一再爲之婚以有遺孤至是微甚乃復爲授室有五子焉家世矜佩自以久困小試課子尤切孩抱時卽令徧識壁間字諸平仄對

偶暨破承未入塾已習之稍長晝庀事於外暇卽口授經注
古文每隨行侍立伴卧輒令背誦稍偷渡輒覺故諸子並以
幼敏聞教使然也子又曾以縣首入泮炳晟從益並有傳以
從益貴 累贈資政大夫

盧謙字益侯邑增生敦行孝友親喪守家禮不作佛事兄艱嗣
爲置兩筵室因得子嗜學能文著有益侯稿屢薦未售至老
弗懈壹志以詩書貽子孫彌留日囑以所遺莊田二十餘畝
爲邑人試費子爾彩爾彬克成其志孫毓奇另有傳

辛家棟字德輝貢生性仁厚友愛仲弟歿撫子女如所生均以
已業堂兄弟貧者分與住宅田百餘畝又爲堂姪擇配給以

產外舅李無子畀田宅爲立繼戚某親老負逋謀出妻代償
使全且周之乾隆庚子饑以錢穀賑其鄉復出粟千餘石平
糶族建支祠捐金六百歲其役凡邑公事靡不踴躍捐輸翁
然稱善人分宜孝廉趙祓者與棟故無素聞其淹滯都門家
有老母爲郵金計偕者使歸養趙謝句有云君爲義士原高
士我敢今人比古人棟洵無愧焉卒年七十孫鼎亨謙亨煥
亨文庠

李珽字德如附貢生性豪邁自奉甚約遇義舉傾囊不吝歲歉
出穀平糶貸難償者輒折券嘗偕同志倡復蓮亭爲橋未成
而疾作屬其子卒成之厥後助修南園萬歲諸橋認修郡學

大成門名宦鄉賢祠本族宗祠助賓興產近又續修蓮亭橋
捐龍洲膏火田通計不下數千金皆承其志云孫應忠應恕
文庠

陳鼎龍字建侯邑庠生性孝友底無間言修家廟置祭產建家
塾撥義田完學事九載備矢公慎屢葺學宮增貧士膏火及
鄉試費甲辰壬戌大饑邀同志出粟平糶全活者衆遇邑公
事如稟免丈田建考棚修城隍廟水府祠及橋梁道路勞費
不惜後子若孫捐建文昌宮助賓興武廟皆其素志卒年八
十八以子貴 封武畧騎尉

辛樹錚字勝音貢生少有至性友愛弟兄樂交文士家不甚豐

萬載縣志

卷二十 人物下

十四

好施予乾隆乙卯大饑邀同志平糶遠近賴以濟族修祖廟
建義塾及鄉村橋路諸舉悉力贊成有族某虧社倉穀迫於
公議而不能償爲代償之僧某爲勢家所感出橐金以解年
近八旬市貨與鎮過樵舍覆舟同人俱斃獨錚若有物憑之
得無恙人咸謂厚德致也卒年八十七子聘三有傳

郭世華號禧堂職監生孝友出至性幼失恃祖母逾九旬癱瘓
在牀服侍左右朝夕不少離弟析箸產蕩盡復攜同爨割已
田以助弟歿撫諸姪悉完娶養贍生平恥涉訟有侵占者輒
予之喜接文士構屏山書屋課子姪并倡建石溪書院教其
族人常積穀濟鄉鄰歲晏減糶遇荒貸不責償凡邑義舉如

修龍河橋惜牛施襖助棺斃路靡不倡指任其事又以文昌
無香火偕同志置產以供後其子大經與九家捐建專祠並
倡起資興皆其遺志世華親見子貴受 封文林郎年八十
四卒太史謝階樹銘其墓子三大經有傳大綸大綬俱文庠
孫光暹職員曾割田三百四十把助入府學資廩生膏火

宋寶字瑤崑監生父拔武舉能爲制藝嘗捐穀三百石倡立義
倉寶席父貲自奉甚嗇而關心學校每念龍河書院文昌廟
皆人文所係而工費浩繁將積金爲修舉計會因事羈外歸
則齒已暮矣將終以屬子海嶠海嶠方斃治橋路未暇兼營
而卒媳聞氏承其志次第畢工學使李少宰辛並有書院記

萬載縣志

卷二十 人物下

五

中丞程聯額請 旌如例肄業生不忘所自白當事立寶主
祀焉生平好吟咏書法宗懷素孫壽萱文庠

陳邦梅字春魁監生孝友敦厚慷慨好施嘗出金二千餘爲本
支建家廟邑葺城隍廟建 崇聖祠考棚育嬰堂朱溪柴田
石橋本鄉真君廟俱捐助不吝遇歲歉出穀平糶晚年撥出
遺業囑子孫遇城鄉公舉務出貲助孫彬采字素書監生亦
好義疏財適邑公事絀費獨出已貲終其局家以之落不悔
邑人義之

辛金銳號北墅由歲貢任義寧州訓導品潔學裕啟迪有方鄉
賢黃山谷祠代蔭一生適嫡裔負有力者欲奪之金銳持不

可州人士敬服焉年七十一卒於官

辛邦佐號絳堂歲貢生八歲日誦千言稍長閱書輒解悟通作文法家苦貧日出採薪供爨夜就祖龕燈展讀房兄某嘉其志攜入塾叔父某資以膏火益感奮力學知縣嚴在昌拔冠縣試旋以第一食餼自是屢魁其曹詩古文並造勁書法瘦硬有率更風格擘窠字尤蒼健求者無虛日晚年主講龍河書院多所造就

王昌仁字應元少力學能文章童試時戲與李榮陸抗手賭第一既而各冠縣府軍旋食餼以恩貢官峽江教諭訓課勤篤名士多出其門居常孝友偕昆季七人朝夕切劘仁尤端厚

萬載縣志

卷二十 人物下

三

多義舉嘗邀同志建因心堂施棺歲饑勸捐平糶邑修崇文堰禁屠牛捐渡產皆與有力年九十一卒子定禎至性過人母病截指瀝血和藥以進病遂愈孫敬敘歲貢生本培賜麟並以案首入泮

辛炳昭詳藝文墓表子紹業進士紹基誠實紹模紹訓俱文庠孫僕舉人价拔貢

辛錦斐字衛瞻號淇園精心計手厥業屢鉅萬而不屑效錢愚態由庠生授衛職不仕歷遊吳楚間既家居助建蓮溪柴田石橋時掩幣埋齒散給棉衣三值歲饑皆倡捐平糶辛氏建義塾出產助凡城廂內外路不可行者悉甃使平董育嬰堂

事院司皆額獎之以子朝俊仕 累贈朝議大夫壽八十四
臨終以義行屬諸子子後出金襄構文昌廟助賓興產孀媳
郭氏復挈私產助賓興及書院膏火文昌香火田得邀
旌典建坊朝俊有傳三子朝鼇武舉輝南廩貢復初文庠

宋謨策字身修監生性篤厚諸子皆有才氣起家累萬金而謨
策督以謹儉惟義舉不少恣嘗出金二百修祠宇錢三百緡
置祀產邑公事如修龍河橋建試棚施棉衣甃路墜罔不
倡捐以子挺職 封武德佐騎尉身歿後家道日盛邑興舉
亦日多諸子襄建文昌廟助賓興產疏河渠構武廟辛卯壬
辰賑饑倡建義豐倉修南浦橋助修郡城及學宮獨構文昌

萬載縣志

卷二十 人物下

閣統計不下萬餘金平糶二次米至四萬石皆承其志云子

四維新標維顯俱職員挺武舉孫鏞鳴謙樹風文斐俱文庠

盧爾洛

字營周
邑廩生

淹貫經史著春秋類釋與學博魯鴻邑進士李

榮陞陳池鳳講學咸推畏友年六旬仁和趙學使歲試拔第
一稱爲老宿梓其文老彌勤學建上達齋課子姪生平內行
甚修親喪廬墓家庭無間言嘗倡修蓮溪石橋子及暉副貢
生及暄優廩生筦考棚事勞績甚著督學王鼎稱其端方及
暉孫光榮士珍俱文庠

彭英拔字豈常曾祖明錫嘗拾徽客遺金八十立俟還之以忠
厚世其家英拔幼習儒書仁慈好善歲製布袴百數十遇露

體者衣之見丐行風雪中必給以徹蓋或箬笠履屐亦自有
西江橋修復圯擬易石梁未果屬諸子成之費金千有奇又
甃迴嶺黃田岡路八里許孫士模舉人士楷士林光斗懋德
俱文庠

陳池鳳字鳴瑞號丹山進士少赤貧事祖母及母甘旨必豐授
徒雖數里外至夜必歸省展衾褥驅蚤蝨俟熟寢乃復至館
兄弟衣食婚娶一身肩之並取給館穀爲文規撫明大家獨
探真際江寧侯學詩新建熊爲霖序而刻之世所傳丹山稿
也又著四書廣義多所發明尤善訓誨館南昌黃氏从太史
中傑中模儀曹維烈夙皆奉爲專師餘詳墓志孫中實舉人

萬載縣志

卷二十 人物下

三

鈞韶嗣音廩生宗岱附生

郭大賚字喜和魁梧有幹才幼讀書長習韜鈴猿臂善射由武
舉任浙江澈浦千總訓練有方升廣西前營守備旋擢義寧
都司駐劄龍勝鎮地錯苗猺稱難理賚撫順防逆終任晏然
歷署鎮標左營叅將桂林營游擊賓川營叅將所莅紀律精
嚴行伍整暇有儒將風值安南不靖領兵隨大帥往定敘功
當升護義寧協鎮象引疾歸在籍不預外事課讀督耕外惟
以詩酒自娛卒年六十八子鳳魁武舉任把總

辛文彬詳藝文墓志子元辰附貢元颺元福孫培慶文庠

郭開英字實函號霽園岡之子績學能文由舉人挑發陝西歷

署鄠縣扶風事均得士民心及扶風卸篆父老詣制府乞留
爲例格值田逆之亂派隨幕府贊軍務事平當道以爲能題
授洋縣治豪猾扶良善卓有政聲未期年以勞卒士民哀之
袁廷鼇詳藝文墓志孫端揆文庠

聞星杰詳藝文墓志

鄧斯沂字浴儒號與齋父鐫以長厚稱有強搶其莊穀者不與
校園有故堆若塚或冒稱祖墳卽讓之延師課子尊禮尤渥
斯沂事蹟詳藝文傳

辛炳晟字融初號淑郵進士數歲有神童稱見李進士行卷卽
扶桀澤之訛或詢以聲韻指示部分無少差長益邃於學六

經子史旁及百家靡不淹貫而不株株於考據爲文頃刻千
言涉筆便古如周鼎商彝令人撫玩不忍釋卽游戲皆雋雅
可誦詩格力追少陵書法蒼秀得唐人用筆三昧一時名宿
如李榮陞新城魯鴻分宜林有席皆目爲國士弱冠應拔萃
科學使蔣元益衡鑒甚嚴邑之素號能文者皆不免紅勒獨
擊賞晟卷五旬餘始登第揭曉後主司知爲西江老宿咸慶
得人爲人英明磊落洞悉時務而恒自矜重遇非義侃侃持
正犯衆怒不辭著作甚富不自收拾存者惟春秋釋要及詩
古文稿時文稿待梓藤石齋墨刻行世餘詳墓志子登瀛彥
瑜彥和孫錫榮俱文庠

辛紹業字服先號敬堂進士博研羣書少時與浮梁鄧傳安齊名學使大興翁公有萬載浮梁辛與鄧說經奪席驚羣英之句既通籍宦京師十四年日與翁大興討究經傳訛異及說文金石學翁每立一說必往復商榷以決其信爲文胎息韓柳詩追步少陵肄業者經其指授悉有法度以疾卒南學署翁挽詩有云老屋青燈淚誰能贖敬之其慟之如此著有冬官旁求易圖存是周禮釋文問答律呂考九歌解古文詩稿俱梓行古文尙書冤辭辨詩經毛鄭權衡周官官聯表儀禮經注證悞春秋禮存樂存經傳車考古文同聲譜同形譜古字逸義俱待鐫餘詳墓表子价拔貢僎舉人仍廩生孫斌解

萬載縣志

卷二十 人物下

三

元有功副貢黠大受附生

辛炳喬字朝嶽號月臺自幼者學博綜載籍故出筆淵雅望而知爲學人之文冠軍游庠制軍孫士毅觀風第一初居南浦坊不妄交游惟邑前輩李榮陞分宜令黃河清分宜林有席金谿王謨數郵筒往來商榷古今繼厭城市於城南五里關最秀園著書自娛晚年以優貢入成均大司寇熊枚宗室瑤華道人並延主西席道人好吟咏與唱和尤多旋卒於京著有周易玉海鄭注補春秋申議注疏刪緯讀胡繩崖通議讀讀書割正編不可不知錄益智糴離騷解袁州舊聞府志叅考田間詩學最秀園集藏家未梓長子承貽字立圃佃儻任

俠以學業未售游京師三十餘年公卿推重遇郡邑事至輒
以身任凡滯京困乏者無不量爲貲助邑人倚之若北道王
人焉選直隸房山尉不就亦卒於京瀕危出金千數百命子
持歸爲祀先經費及伯叔兄弟媼黨貧乏之贈櫬歸日多感
激泣下者季子承毅孫次林俱文席

盧毓奇號鶴亭自幼有至性始家貧就傅母食以好飯而自餐
釜底焦者奇覺之涕泣不食母與同飯乃已稍長念父苦讀
書困生計因改業服賈以養手致貲累萬卒成親名娛晚景
焉有五子思承先緒教讀甚殷延習進士昆季爲專師凡十
餘年忠敬不衰諸子用是才學顯治家嚴整而豪俠多義

行遇邑大事艱險無所避嘗因某案赴質金陵家幾破卒得
直今後嗣熾昌人謂有天道云子文寶試輒前茅銳意成父
志院試僥得而失遂歿當祖母李改葬術者謂宜科第不利
長房寶曰長房卽我也諸弟獲福親志慰吾願足矣力贊成
之次廩生文宜兄歿後身任家督體親意督課弟姪綦嚴持
家規維謹然性孝友事父及後母極恭順愛異母弟無幾微
間遇有長用必陰爲彌縫人皆畏而服焉方毓奇傾家爲友
縱之逸官拘其眷口去適文宜鄉試回卽挺身請代母官問
若生母耶宜曰均之母也何分前後乃義而釋之次武庠文
宏出繼以友難冒險從卒死於外友歸詢其所涕泣而已因

招魂以葬此其友雖不足道而宏與人之壹不亦諒哉次舉
八煜另有傳季文字豪邁而篤摯以兄宏久出無的耗身走
江淮楚豫蹤跡殆遍迨子昆鑾貴廉俸所餘悉命公之羣從
臨安石門並建書院又買地瘞故宦之無歸者居鄉遇義舉
必竭力襄成或貸金謀鬻婦還券全之性癖山水自龍州返
棹詣獨秀峯攬勝竟日歸舟歎曰造化之奇於粵西觀止矣
怡然就枕而逝類得大解脫者論者謂諸子咸有父風寶得
其孝宜得其義宏得其俠宇得其豪煜能成其志真難兄難
弟云昆鑾由進士屢宰劇邑擢郡守現官鬱林知州

辛守身字斯申監生三歲失怙事孀母以孝聞待人和夷至事

關大得失毅然持正論無少徇家故貧勇於爲義親故以緩
急告必曲爲之謀私橐有餘則罄底付焉延順支祠之建勸
助督工獨任其勞任嫌怨不辭又倡修龍河新橋立惜字惜
牛各局皆終始其事凡邑有興作經其部署莫不費省工堅
章程可垂久遠紛難經其排解言重千金實誠信足仗云

辛樹穀字廷碩爲名諸生孝友出天性善事父母祖父母俱得
其歡生平端敬自持力行方便訓課及門必以良知良能爲
本謂五經四子書皆闡發仁義禮智而莫先於仁嘗刊感應
篇陰騭文功過格集驗良方等書皆仁者之用心也當時邑
中善士必推穀與守身二人守身才足達行而穀之書亦足

以淑世蓋莫得而軒輊云

湯舉字伯英庠生父安猷倡修仙居橋家中落至舉益窘仍釀
貲脩葺以終其志生平仁心爲質誠信孚人有豪某健訟一
日以是非投爲揆情度理反覆開導事立釋其排解多如是
爨夫因貧鬻妻偕門徒助金全之宜春陳某來從學家遭回
祿拮据甚舉飲食教誨視若己出卒成其名凡鄉中善事如
修橋施茗掩骼拯溺女無不與皆貧士所難子薦馨有傳

辛啟泰字仲和號敬甫原名梅臣少負奇氣折節讀書爲諸生
以詩文游方伯廉使間未嘗干以私足跡所至喜搜羅金石
志乘文字事關合邑利害圖之甚力如呈復棚額中雖牴牾

卒如所請主講濂溪書院議拓周程諸賢祠添肄業房舍增
膏火虔士頌之由副貢充官學教習期滿發江蘇以知縣用
大吏知其才檄往徐州理積案聽斷明允百餘牘次第決遣
無不悅服歷署睢寧豐縣江浦篆所至風化爲先在豐時首
捐廉修丁蘭祠卒江浦任著述多散佚惟所輯辛忠愍公集
及少作新畚集行世孫師軾廩生

汪元英字雋斂號春圃性豪邁作文有奇氣以優貢入都間走
齊魯山陝所至輒覽其名勝筆墨益超登賢書大挑自注就
教署奉新訓導多方造就士慶得師以母訃奔歸親覓佳城
搶踣風雪中葬母踰月遂卒生平踔厲風發任事勇往京師

置三縣試館邑修志建賓興皆數言而決方賓興堂之創議也苦無基英商族眾首以祖遺地輕價出售餘基因次第購就後九家建廟卽於是規畫焉其急公赴義如是素精形家言志內分編山川瞭如指掌邑城三面環山惟北面平曠無關軸英議豎文塔已鳩工庀材矣會英之任遂爲浮論所沮覽形勢者至今惜之所著詩古文秦游草藏於家子良徵煥然孫敷德俱文庠

陳鴻翥字夢龍號拙甫原名池鳳幼警敏喜讀書從伯兄池鳳習帖括盡得其規矩而能出以變化構藝敏捷名噪甚省會宦達家爭延爲師甲鄉榜第六晚就東鄉教諭勤於訓課於

艾千子後尤加意焉東鄉士多寒畯新生上謁從不計修金齋廚蕭然自若洎平官無力治殯具賴同寅及門致賻得歸喪著作散佚惟諫徒草行世

鄧錚字金和號古愚附貢生績學有聲受侵侮不校好施予先後歲饑贍族鄰凡穀二百石有同學負逋甚感出橐金三十償之族無力聘娶者爲之完配佃鄰某貧欲出妻贈金止焉遇邑公事隨力贊成年老猶切觀光兩邀

恩賜得國子監學正卒年八旬

袁振藻字素先號繪甫幼穎異日誦千言爲文章性靈灑灑以幼童應試兼覆經學使曹器之人邑庠藻外和內介涇渭分

明遇非義之義雖萬口同聲毅然不惑而忠信明決公事成
倚爲重邑建考棚與同志悉心籌畫督工購產略無虛糜餘
如修邑乘構賓興創白長來秀塔及一切鄉族公項罔不經
理得宜生平服膺學吃虧之語家難屢邁處之泰然而方便
事時見於鄉黨子豫慶晉慶孫元篤俱文庠

辛萃字永之號德生幼聰俊讀書目數行下作文自出機杼時
有豪氣耽吟咏古今體俱擅長屢見賞宗匠肄業豫章所交
盡知名士兼通繪事染指作梅竹尤蒼勁絕倫丐者無虛日
登賢書兩赴春闈邁疾卒于曇文庠

鮑啟倫字超庭職監生性好義邑棉衣局獨力經理者十餘載

萬載縣志

卷二十 人物下

三

凡邑善舉如惜字惜牛建廟宇修橋路靡不樂從瀕危以力
行善事屬于鍾瑞後鍾瑞偕九家建文昌廟助賓興辛卯壬
辰倡捐平糶助田 聖誕會創學宮土地祠皆厥考素志

辛從益字謙受號筠谷由二甲傳臚改庶吉士授翰林院編修
纂修 國史嘉慶戊午典試福建充 文淵閣校理教習庶
吉士辦理清秘堂事兼撰進奉文字遷江南道御史巡視西
倉具改順天鄉試章程駁刑部秋審悞入二疏辛酉陳情歸
養承歡之暇惟以造就後進爲務服闋補河南道御史轉掌
四川道升吏科給事中轉掌兵科凡居諫垣三載封章屢上
直聲滿天下如條陳聞見則發州縣之貪縱長蘆法碼案則

許大學士勒保之不迴避請申明罔積禁言步軍統領之不
平允論延擱賊報言東撫同興之昧事幾請詳慎甄別則斥
督撫之徇私任性請飭查收養幼孩則摘兵丁之橫擄平民
與夫正文體一疏酒商盤剝運丁一疏戶部書吏婪索一疏
又於當日主司督糧及部中堂司俱有關礙以故忌且嫉者
日衆而廉潔端謹無瑕可摘

睿皇帝實深知之朝上夕報可雖

明旨已行者亦屈已從之大臣那覆奏幼孩事至有朕先引咎之
諭孤忠上契何其盛也乙亥升光祿寺少卿

召見詢及邪教從益奏正教昌明邪說自息教匪以利相誘今得官

萬載縣志

卷二十 人物下

美

者不問風俗淳澆惟計缺分肥瘠官自營利何以訓民欲正
人心宜先責成司牧者

帝旣之卽有旨通行訓誡升通政司叅議內閣侍讀學士

簡放山東學政校士謹關防嚴場規弊絕風清所取不拘一格而必

衷於理士有不率教者繩以法州縣擅辱生員者嚴批交辦
甚則叅革如在平章邱諸案尤嶽嶽見風裁士論至今翕然
在任擢通政副使光祿寺卿差旋稽查東四旗覺羅官學道
光元年辛巳擢太常寺卿壬午升內閣學士兼禮部侍郎閱
庶吉士散館卷新進士覆試卷時江西巡撫毓岱有官理穀
當奏因疏言其弊爲富民害者二爲貧民害者二後竟停止

命赴陝西查辦案件渭南民挾財勢殺人審官受賕皆論如法奉旨細心研鞫秉公持正可嘉之至陝西買馬歲爲民害復

命時面陳其詳得清查癸未充文淵閣直閣事武殿試讀卷官升禮部右侍郎脩通禮多所更正甲申兼署吏部奉送

實錄

聖訓尊藏 盛京祇謁

三陵勘工收租事畢轉左侍郎旋轉工部視學汀蘇使署在江陰薪米供應向取給於縣獨峻卻不受壹用民價自買又革按貢部費裁節孝請匾費嚴懷挾親校閱正文體一如在東省時以奏駁收漕章程與督撫意左公事頗多齟齬然文移往返

萬載縣志

卷二十

人物下

三

寓書辨駁伸士氣抑吏權動灑灑千百言或謂指陳時事太過待士子太偏不顧也蘇人士久愈思之丁亥轉吏部因病疏請開缺遂卒年六十九華亭江陰等縣多立主祀者生平孝友性成交晚年患癱便溲常親滌風日清明則背負以出告歸養母每事先意承志事仲兄以師禮宦情素淡貴要門罕通刺惟日與同志唱酬評閱就正詩文爲樂天懷坦白官政和衷然遇非理事正色力爭不爲權要屈承

成皇帝溫諭爾人甚樸實無揣摩亦無希冀可謂特達之

知矣爲文自達所見筆力蒼秀動與古會賦與四六俱大氣磅礴格律謹嚴詩學王右丞閒取法溫李况更喜杜韓書法宗顏

清臣動必以正所著詩集文集駢體集奏稿館課偶存公孫
龍子注待刻子桂雲侯選訓導師雲有傳辰雲舉人鵬雲有
傳孫履閑文岸

辛朝俊字惠蒼號敬亭少讀書有用世志以科甲途隘遵例報
捐鹽大使補山東富國場場素疲設法調劑產鹽倍常額私
販殆絕尋捐升知縣分發廣東委審積案多平反上官才之
使署陽江劇邑也到任革陋規訪訟師猾吏裁以法訟風頓
息將及代制軍百齡過境士民請留三載乃卸篆委丈順德
香山隙田劃界定賦兩縣帖然隨制軍出洋擒獲海寇烏十
一二適張保仔投誠並委審辦被裹脇者悉開釋署澳門同知

卻供帳鎮以清靜民夷相安無事去之日洋賈攀轅羅拜歷
署嘉應通判開建陽春電白長寧各縣事所至清介自持以
教養士民爲務尋補普寧城內河道久淤爲捐廉疏濬民甚
便之審斷逾勤間搜積案賴申雪無算循聲較陽江尤著調
新會未久告養歸侍奉喪葬盡如禮遂不復出修縣志邑侯
衛屬董捐輸挈金百餘倡仍身走各鄉勞怨不避迨構文昌
專祠建武廟及先代殿疏河建閘皆首其事計費不下二千
餘金邑起賓興率其弟姪輸金亦二千餘生平孝友睦婣出
於至性母病衣不解帶月餘友愛諸弟撫諸姪皆成立外侮
以一身肩遇親朋告乏極力周給或稱貸以助宦途廿餘年

不名一錢負債甯取償於家卒年六十七子輝南候選訓導
輝祖山西候補典史

唐錫鐸詳藝文墓志子逢辰湘潭縣丞若馨以縣丞分發江蘇
唐錫純字軒年增貢生幼失怙恃能得祖母歡讀書穎悟以案
首入泮志益勵務根柢學尤潛心義理爲文揮灑如意多所
聞發生平精明渾厚有熱腸族維畿一支獨微爲經理調護
得復振享堂祭產經其會計祀益腆有餘羨資均惠素耽吟
咏工繪事所繪山水有石谷子筆意然自矜貴不輕爲人作
作必自題韻語詩畫俱蒼秀可玩子滄舉人孫朝棟廣東太
平巡檢

萬載縣志

卷二十 人物下

五

盧煜字位南號小山性敏爽讀書如有宿悟詩古文儵然遠塵
氛肄業豫章名流推服居家孝友無私蓄倡建祠宇受貸累
不計遇鄉族紛爭力爲排解或出橐金彌縫之登賢書適丁
母憂未計偕襄輯志乘釀賓興費甚著勞績服闋北上經臨
安留姪昆鑾署董建錦城書院兼課其士卓有師範疾卒以
櫬歸士林惋惜之子昆鈇文庠

李以正字守中附貢生性醇恪壹意敦善行砥厲廉隅爲務睹
宗祠支祠皆就頽頽挈金千餘倡新之四邑移建郡學邀族
兄姪子合建大成門名宦鄉賢祠其門樓圍墻則獨任之知
府鄭鵬程議擴試院又認修亥棚并大堂邑考棚武廟之建

悉樂輸集事及五區起賓興捐田千餘把他如慈溪神山白沙萬綏朱溪富山諸橋梁或獨力創構或捐貲助修俱有成績其餘贍渡濟渴平糶蹇路不勝述統計不下萬金有奇以樂善好施邀旌典生平孝友家居風節自持不輕入城市道光元年公舉孝廉方正

恩賜六品頂服優養林泉完名而卒臨歿猶屬子楨貯粟備荒云湯薦馨字顯宗號馥堂幼聰慧肆力於學尤工制藝暑齡列諸生試輒高等山陽汪文端公邑先達辛少宰尤器重之連戰捷鄉舉居常恂謹身若不勝衣而引義慷慨時見仁者之勇其授徒擇人而教先器識後文藝故經指示者文皆有規矩

萬載縣志

卷二十 人物下

四

無跣弛行以鄉距龍河遠倡議建龍岡書院教三區子弟并籌大小試鹽各區立義學自是始四上公車挑取教諭壬辰文已入彀因別房爭所私卷見院旋歿京邸合郡惜之子光裕文庠

李明善詳藝文墓志

郭大經字緯之號星嶠始由副貢取教習官奉新教諭有惠績載名宦既成進士任安徽太和知縣時邑新政繁缺稱難治下車先除民害嚴捕緝法河南盜首蔣魁與其黨潛入境卽捕得自是奸宄屏跡尤重文教書院月課必親臨公暇則進諸生講學論文娓娓不倦士因知自愛無涉訟者捐廉濬白

洋湖一帶溝渠窪地悉成沃壤聽訟明敏到案卽決無羈留
有神明父母頌嘉慶庚午聘入闈所得八人皆江南名士母
憂去任士民傾城出送有隨至潁上霍邱者接丁外艱深懷
止足改就教然才高意廣所在必有以自見補南康教授抵
任卽出百金倡紳士葺學宮凡 聖殿各祠署齋煥然一新
費不足復倍捐以葺功又倡落蓼花池水口歲登穀數十萬
石民立主祀焉創編星子邑志修宋儒劉凝之墓壯節亭冰
玉堂甘烈女墳皆躬任其勞爲鹿洞監院修院舍清洞田請
於巖使歲增膏火五月肄業者至今賴之歸里主講郭氏義
塾十餘年多所成就主修邑志徵引博瞻一切義舉具詳墓

志邑大興作幾無遺焉性孝友父患危症寅夜走數十里延
醫診視又遠步武當祈禱病遂瘳攜兩弟共讀儼若師友倡
構會祖享堂撥產爲伯父立後從叔父遺一孫爲翼而長者
兩世亦人所難者卒年七十九著有詩文集制藝偶存四書
細錄待梓子光昕光昫孫傳曾自超俱文庠

高湘文字位慶號鑑浦舉人家貧力學以能文稱學使仁和趙
公尤器之兩主講龍河書院孜孜啟迪後多爲知名士性孝
友篤宗盟始族人散處各鄉無所統壹始祖蒸嘗亦關湘文
與同志多方糾合創建大祠於城內又以本支郡城試館公
諸合族自是羣情大和科名亦盛五旬後由大挑司鐸弋陽

教士勤懇如主講龍河時又捐清俸倡修學宮考舍及謝文節公祠士翕然向風洎卒官崇祀德馨祠生平耿介自持公事罕預然當大利害執義侃侃不能爲衆勢屈著有文集待梓子樹桂樹梧文庠

袁開慶詳藝文墓志子方泰文庠

辛聘三字華國由館班發江蘇歷任新陽江陰溧陽金壇典史署武進縣丞升東山司巡檢勤於其職在金壇最久績亦最著訟事到案卽決無羈留枉縱者民以委捕廳爲幸巡邏尤密盜賊賭博一舉動輒獲奸宄屏跡市肆晏然歲祲勸紳士出粟煮賑爲分賑部署日夜監巡民沾實惠道光三年水災

萬載縣志

卷二十 人物下

聖

倡議請蠲卹縣令以無成例難之聘三面稟太守情詞愷惻守爲感動得請境民謂邑災有賑自是始升任時士民上屏幃行祖餞者一月不絕近來雜職中所僅見也尤篤友誼始供事內閣族少宰公方應舉子試爲莫逆交洎少宰蒞吳尊卑濶絕情分無渝凡吏習士風內外積弊言無不盡多士傾心蓋有助焉卒年八十葬蘇州

郭如泰字慶宗山附貢考取校錄官長蘆興國場大使場籍遼散丁疲徵收數紬前任虧誤悉泰爲賠補性慈祥不忍施敲扑歲虧愈甚屢捐廉墊解任時積串四千餘紙或謂爲交盤可取償後任泰惻然曰此貧民也付後任將操切從事其

何以堪且吾旣憐而紆之又以取償故使後任迫之謂初心何立取串付火灶戶聞知皆感泣嘗書坐右云養心莫善寡欲爲政不在多言可想其廉靜焉考滿保舉知縣引疾歸生平敦孝友謹言行葺 崇聖祠修考棚皆身任其事讓產焚券周貧振乏隱德甚多而尤得力於養靜處事安詳從無疾言遽色雖遭橫逆無忤容歸田後築室數楹題曰安雅朝夕課諸孫其中不交外事所往來皆文士開樽瀹茗清談而已客退手四書孝經或先儒語錄涵泳其義倦則閉目靜坐有攤書消永晝兀坐養餘年之句卒年七十九孫功俊廩生功溥功敘俱文庠

辛師雲字京孫號芝生從益子進士官戶部貴州司主事幼穎慧八歲能文十六入泮父授以古文詩賦駢體諸法出筆便成規矩於書無所不窺經史外凡天文律算兵法刑名家言皆能明其大指久隗官生年近強始以民卷魁鄉榜聯捷南宮時父去世未久在 朝多故舊以其才地爭欲致之詞館顧僻居蕭寺不通一問致 朝考見抑用部曹咸共惜焉是科分農部二十二入師雲居首又將考軍機座師穆相國期必致之師雲松阡戀切亟歸省父執交謫不顧坐是序資獨後未補缺終在官鉤稽精核而務存大體堂官倚重旣主本司稿兼派山東司井田科捐納房事皆劇任也積勞致疾卒

卒前一年南書房求工大字書者相國獨喜師雲書欲授黃尚書供奉例使具所業進以跡涉捷徑婉辭焉其介節如此生平瘠已肥人遇急難不惜典質從知好在京病故者皆率先厚賻邀同輩醵金以歸其喪若眷口急不得歸則別資以月費故知好有急必首叩其門至誠待物視人事如已同鄉一切倚辦卽外任有半面識者當疑難造請莫不籌畫周詳故知交日廣心力亦日瘁至其撫姪如子待同生無畛域培祖墳助寡穀爲疎族延宗二爲窮戚舉殯三自未達時已然尤人所難者著有勤補拙齋集

辛元辰字柏坪文彬子弱冠游泮屢薦鄉闈乾隆甲寅卷已發

刻卒不售乃援例貢太學隨宦入蜀謂餞者曰此行無它願惟勉成親名以無負知己歷五任以耳目發摘奸伏父以循著稱如其言父任巴塘留辰護眷口嘗獨策蹇省親好事者爲繪塞省圖歌美之歸里後卜築白良鄉以時迎養父愛其山水樂而忘老名流復爲圖咏所謂青陽草堂者也爲人剛介而俠意所不然面斥無少狗土有文行延譽不絕口尤篤於師友嘗聞關數千里揭重貲急難冒疑謗不辭論者以爲諒素喜吟咏好賓客家雖落不介意招朋觴咏自若族少宰視學日有所贈悉以父名助賓興不自私晚年族推耆宿事必咨詢達房建止公祠自展發之止公族之凡無後者冬祭

後輒展祀焉合於陽厭之義有詩集待梓子培慶孫承祐俱
文庠

李宗彝字迎祥號徽堂舉人性穎異鄙爲章句學詩古文詞皆
敏贍處家孝友爲族長以嚴正稱家雖貧樂引人爲善鄉中
義舉若建慶豐倉修蓮溪橋並勸捐力先是兄宗漢善居積
兄歿嫂氏楊出貲創義塾教族俊捐龍洲膏火建六百橋彝
實贊成之俾邀 旌典計偕兩次以足疾絕意進取旋卒

楊眉字蘇門郡庠生幼聰敏八比外兼工詩詞三試不售絕意
進取一意養母訓弟爲務家有小樓除爲讀書所母龍素勤
紡恒至宵分與眉約夜讀以車息爲度兩弟相繼爲高才生

萬載縣志

卷二十 人物下

墨

繪有岑樓聽紡圖一時名士爭題咏焉治家有法內外百餘
人服物相通母旣老承歡惟恐不及諸弟姪執業於外晨出
暮歸必各攜甘旨奉老母張燈宴笑管弦鼓吹各獻所長其
小者則令覆經相角熟者得果餌賞冬時擁地鑪掃雪烹茶
聯句爲娛家有煩苦事不許道一字恐損老人歡俟母歸房
而後散孝友之風邑中無兩常偕同志辛元辰袁開慶輩文
酒燕游野店山家隨地開尊不減晉人風趣和正孚人鄉曲
是非經剖判無不解著有岑樓詩集

郭光笏字屏藩歲貢生穎敏者學舉業外詩宗白傅書有右軍
法籀庠三十餘年屢試高等從游甚衆多成材性端方有幹

濟邑公事恒倚爲重如建考棚創賓興疏河建閘及郡修考舍城垣皆始終其事晚年念先人修學宮績歷久漸就頽乃率先呈請募貲重構經營三載卒觀厥成爲族長二十年多善舉族論翕然至於維持城內族產使僑居者頓沮成謀尤合邑土著所共欽慕者道光丁酉

恩賜舉人卒年九十二著有慎餘堂詩集

郭祖培字家先歲貢生淹通經籍尤專力四子書有所得卽筆記之積久成帙皆根據確實不爲苟同作文確守先正兩薦不售遂一心考據冥搜博采學日進家計屢空泊如也著有四書日知記天文圖說律呂考日知記已梓行

萬載縣志

卷二十八 人物下

巽

朱映晨字文明鈴田武舉歷任大河海寧金衢杭嚴溫州台州領運千總積功晉五品以台幫航工逃案被劾久之捐復補金山衛領運卒官爲人豪爽而寬厚與人交傾蓋如故相知甚廣負者亦甚多終不怨反曲諒焉在官優卹疲丁丁徯其寬當抵通交運或逃去使費悉墊應前後積欠至七百餘金盡舍之州縣以其豪也應交幫費輒怵以好語從無取盈者顧獨恡於院道吏勒索多不應故金山任中扣運者三所領皆減運得不償失有由也居家孝友在浙時迎養二老甚得歡心爲兄置筵使有子晚年宦囊甚澀仍攜養甥姪餽遺諸弟無間卒年七十六

李承烜字良慶號遂夫白良舉人聰慧善記作文有法度大挑二等前署長寧後補崇義訓導所至實心造士以疾卒官爲人鯁直遇非理面斥不避佳士當前稱譽不絕口恥涉訟庭非公事不見邑宰性孝友次第出繼仍挈同爨委以家政季弟以武舉効力撫標先卒待其妻子尤厚署任時迎侍老母甚得歡心比實授擬奉迎而疾作遺書與弟訣有子職未終死不瞑目之語聞者悲之年五十九子興霖文庠

辛鵬雲字發孫承父蔭補順天府經歷以勤能京察列一等會丁憂服闋補奉天故美缺也守清白訓多所裁革上官察廉委署寧海知縣時水寇猖獗侵掠沿海地武弁望風退州

萬載縣志

卷二十 人物下

罕七

縣官且致賂焉鵬雲捐廉募鄉勇設方畧寇來與戰戕其衆十餘自是境無犯者瀋陽旗民雜處左袒成習巧宦承意指輒速化鵬雲曰冤平民博高遷祗爲先人辱用是遇事齟齬有旗員某負民錢反嗾羣僕斃焉以實讞上法當抵主者怒撤委欲坐以失入賴讞語詳明部議置原審不問愈內恨蔽其功并京察斬之已而上憲易舉卓異更署興京通判抑強扶弱一如寧海時覺羅某者故將軍嫺戚常指官詐民財拘訊得實方具詳而擅拘檄下將會劾首縣向府尹力爭謂此輩素橫今整頓者獲咎民更不聊生且某並非職官法得拘乃止京察又奪凡在瀋十餘年屢以疆直見忤沈下僚而

貴倨者動以聲色相陵遂抑鬱致疾決計歸田行至安慶卒
鵬雲雖得官雅志以科第承先經歷向不鄉試自鵬雲援京
察例南任皆奉

特旨俞允遂爲定例在官暇卽讀書雖赴轅監印手帶一編衆共
迂之不顧爲文繼幽鑿險力厚思沉而不甚修飾故屢困棘
闈時見賞於宗匠

孫馨祖字明薦號此堂能文章兼工詩古擅詞曲乾隆辛卯以
第三人舉於鄉挑發粵西署蒼梧知縣有政聲以祖母艱歸
服闋任福建甌甯分校皆知名士報最列上考大吏廉其材
堪治劇調任同安以母憂去職旋病卒於外後歸葬著有此

萬載縣志

卷二十一 人物下

四十六

堂詩集梯田山人餅話昆都俞歌紅牛記諸院本藏於家

辛辰雲字北孫號黼文辛卯第五名舉人少宰從益三子自幼
隨父任學有家法文有經術從益嚴正奏記文衡不輕假人
辰未嘗不與非獨才之且信之也父卒里居清貧至掌教龍
河龍江書院以館穀自給故交世好多當世貴人未嘗一干
之咸豐五年賊竄江西及萬載所至郡邑風靡獨省城未陷
辰重繭走湖南乞師撫軍駱遣同知蕭啟江都司田興恕等
援江委辰籌辦勸捐團勇以助官兵自辰倡大義邑中豪俊
皆響應焉袁瑞臨三郡相繼克復皆辰以萬載接濟力也駱
撫軍謂是役爲吳楚第一勳蕭田後至方伯提戎之任辰保

舉湖南知縣殊無出意旋以憂勞感疾卒蓋辰自以名臣清
宦後風期氣節蘊結益厲願忠於國不顧身家故冒險觸忌
而罔恤云著作甚富唯縣土著志板行餘未梓子履閑郡廩
生

何良號小石副貢生篤學嗜古不屑章句經史大義靡不貫通
諸子百家天文地理算法醫書旁涉而討其源早歲落筆軼
羣動與古會梓行小石詩草皆其少作壯歲後學益邃心益
虛脫稿詩文輒被人攘去不自收拾其友教務經術不徒事
舉業成就人才甚衆孝廉辛有猷郭春熙宋炎劉文毅尤說
服專師之晚年悟境日將五經四書尋繹玩味擺脫傳註獨
契真詮其學與年俱進蓋如此家貧不治生產於古今成敗
民生利病恒若身親乃以一貢終名業未顯士論惜之著有
春秋畧例古蹟七絕三百數十首名寰中集國朝畫家詩數
十首待梓子鯨邑附生

宋階明字熙瑞號輯軒由監生授分缺先用知府分發浙江咸
豐十一年賊圍杭州連營數十里城內紳民聞風先遁階明
方在省候補毅然不去中丞王壯愍公才之扎委七門總查
力守孤城三月餘糧盡援絕城陷階明在鳳山門被賊執罵
不絕口遇害同治五年奉

旨賜卹典祭塋雲騎尉世職入祀昭忠祠子世培由試用布政司

理問兼襲雲騎尉次子世材湖南候補縣丞隨父在浙殉難
同治五年竝

賜卹典祭塋雲騎尉世職入祀昭忠祠

湯譽光原名調元號子燮暑齡入泮嘉慶戊辰由優貢舉於鄉
道光丙戌大挑知縣分發南河丁亥辦興化賑奏改歸地方
補用開河工竣優叙歷任婁縣無錫吳縣知縣浚木渡鎮河
道修三堰五閘民免水患辦理賑恤署柘林通判兼大湖同
知丁父憂回籍服闋分發湖北署監利知縣補襄陽縣陞襄
樊同知荆門州州同攝荊州府篆年老致仕歷充江南湖北
同考官李修撰振鈞朱大史右曾皆所得士性耿直遇不可

萬載縣志 卷二十 人物下 五十

辜雖忤上官勿顧清廉自矢歷任多繁富地而宦橐蕭然祇
遺經史數篋工吟詠簿書執掌暇輒以詩自娛其胸次清曠
如此著有窺一軒制藝試帖仿蘇和陶詩梓行其餘著作甚
富俱未梓年七十四卒子敦臨署山東濟南府經歷敦敘江
蘇華亭縣典史敦誠號我齋候選縣丞軍功以知縣用部選
廣西義甯縣知縣未抵任委署平樂粵匪蹂躪人民凋殘敦
誠招撫流亡始就甦息繼賊復至敦誠募民堅守授兵擊散
萬民歡呼明年歸本任有訟經十餘年未結者到任立爲判
決人稱神君詩有父風雖處疲邑吟詠自如丁父憂回籍年
四十卒

高思訓原名龍號滄亭十歲時舅張鶴鳴出一對外孫墻背笄
爲問幾時得成棲鳳竹應聲對曰尊舅池中魚必然他日化
爲上天龍舅大嘆賞父因以龍命名弱冠遊庠旋登賢書歷
任貴溪永豐教諭循循善誘士心悅服年六十一卒於官生
平氣度冲和爲人排難解紛委曲開導必極平允咸豐六年
髮逆據縣籌餉辦團多所贊成而口不言功鄉里益推重之
子蓉曦廩生蓉昞蓉暉皆文庠

辛价字介人父紹業官國子監助教少隨父讀書試北闈不售
歸入縣學屢試超等補廩晚舉授萃科學使許乃普嘆爲宿
學聘衡文焉著有協韻集成詩文稿子斌解元十四藝俱進

呈大挑知縣署四川南溪縣事草淘金病民及傳呈積弊歲
一裁陋規千數百金民皆頌之以目疾改授新喻縣教諭卒於
任有功舉人文有根柢性孝父晚患痔調藥滌污不假於人
榜後旋歿士論惜之

辛僕字仕勉號升甫紹業子幼穎異讀書目數行下文思敏捷
援筆立就嘉慶庚午舉於鄉十三上公車四薦不第鍵戶著
一書天文地理風角占候歷法算術無所不通尤精小學所著
有春秋異文考証十二卷春秋內外傳古文存三十卷文毅
公張芾爲之序易其名曰春秋內外傳類文疏義試律滄螺
集二卷王汾源先生題曰辛稼軒詞辛升甫詩古人可作吾

誰與歸鄧鹿畊先生題曰詞中蘇辛非秦七黃九之比其爲名流推服如此子祖范博學卓世著有小同詩鈔二卷盧諤爲之序梓行鱣揚廩生宗周邑附生大受郡附生子尙邑廩生

辛公弼字文豹紹業子父喜其諳練命赴京時爲援例入官適國史館修

實錄考筆帖式在館十餘年爲當事所器重

睿皇帝幸古北口大蒐當事命掌戮禽籍凡三次議叙以巡司用因母老歸族推理總祠及房祠事增置祀產立義田建試館修譜牒生息經畫悉出其手倡立六房會購田數百畝爲建祠

萬載縣志

卷二十 人物下

五十一

之資邑中疏河建閘理賓興輯邑乘諸義舉襄辦皆甚得力嘗教人以立心爲本謂心術既正則百爲皆善其行詣有由然也子孚德刑部主事

辛拱照字顯榮號凌雲辛酉拔貢教習報滿以知縣用因母老改教選授靖安教諭丁母憂去任服闋歷署南城安仁教諭補授上高縣教諭拱照素有文名任上高時縣中義塾延請掌教悉心訓迪人才奮興先是上高鄉試最艱連四科無一中者自後每届中三四五名不等稱極盛焉在任三年歿生徒攀柩號哭盈街衢子樹仁有傳樹義庠生

辛樹仁字道傳號靜山戊子科舉人房師湯爲本邑令有富民

被逮出巨鑊或關說力拒之曰不可以對我師選授龍南縣教諭龍南俗獷悍有兩姓聚眾將械鬪縣令無策樹仁召兩姓生監面諭之眾遂解散縣無城請縣令勸捐修築完固又增外城數處後粵匪環攻堅不能下觀察周玉衡勦匪至縣欲加卓薦力辭不受在任十餘年與諸生講學以躬行爲勗論文一宗理法以軍功陞贛州府教授在任一年卒於官喪歸哭而送者數百人子錫洪舉人

盧尚文字宗周邑庠生以薦未售絕意進取性孝友和平所食學租原載武庠不與後弟入武庠仍均分之人有以橫逆加者概置不校尤喜訓迪後進戚族鄉里中有賢子弟樂爲造就一時秀士多出其門族祠乏祭掃資捐產不吝鄉邑有義舉亦常樂從或以慷慨稱之必力諉焉其善而不居如此子瑶林舉人占魁邑庠

彭才尹字任夫號萃圃幼失怙事寡母孝性聰穎以幼童入泮歲科試屢列超等爲文雅正清真題理題神無不曲盡善教誨從學甚衆督課最嚴不率教者面斥不阿後進多所造就新昌袁大史玉麟其高弟也性豪爽家貧不治生產好客嗜酒酒酣談論古今人皆斂服邑義舉如賓興樂泮龍洲書院賴其力勦成之家世謹厚誠子孫永守勿替子召棠濟川俱增生孫燦垣舉人

辛介福字鳳味號柳垣有文名家貧聚徒講學從遊者衆歲得館穀甚豐不爲私蓄盡以供甘旨辛從益督學山東江蘇聘襄衡文試揚州得謝增卷亟薦之後得探花餘所拔識多知名士中戊子科副榜有友官京師勸令來京應北闈鄉試兼可考教習膳錄爲出身地步以親老辭其篤於孝養如此家居兄弟怡怡訓子姪一遵禮法長幼六十餘口同居無間性嚴正人不敢犯修譜牒增祀產學宮義倉諸善舉悉秉至公不辭勞怨倡建龍雲書院於小江濱四五區生童俾得就近肄業著作甚富多散佚惟詩文稿存待梓孫榮文庠

陳綿韻字發祥號雅齋性慷慨尤知尊重文學四五區合建龍

萬載縣志

卷二十八 人物下

五十四

雲書院首捐千金衆情踴躍遂以集事繼復捐錢二千緡以資膏火龍河書院經費不足捐數百金修理學宮亦捐數百金鄉建義倉捐穀七百餘石弁命子弟經理生息歲饑平糶多所存活其他義舉助家廟以祀先助修城以固圉助賓興助樂泮以資大小試費尤指不勝屈綿韻家故貧力於耕作致貲巨萬得之難而捐之不吝且其捐數盈千累百不待勸而自樂輸其弟立齋聽命惟謹畧無異言均人所難能者孫錫庚文庠

郭樹榮字信夫大學生四歲父母相繼歿兄樹倫亦僅八歲雖幼執喪哀毀如禮依伯叔父母不煩教督自能成立稍長樹

倫經理家政榮聽命維謹倫亦友愛備至數十年無纖毫隙性誠樸以古道自處亦以古道待人有負之者至再三坦然不介意延師訓二子督課甚嚴晨起偕子入塾背誦功煩慮師過勞已分教其一功無曠而師亦多暇凡師之館於其家者得以暇時自理舊業榮亦時相勗故師之學亦進何良邑博通士榮建別業延之主講開館時請於師曰學問必務根柢不徒獵取功名榮所以敬請先生者求實學願先生勿以俗情相待良躋之掌教六年指授皆經史大義詩文悉遵古法不苟時趨良嘗語人曰吾教學多年各家父兄惟以科名冀其子弟如榮之能見其大者鮮矣豐脩脯腆肴饌稍知敬師者能之然皆文具體念纖悉視師如一家如一身榮之外吾未見也年六十四卒疾革時幼孫侍側忽詰之曰爾書不溫生矣蓋性之酷嗜雖昏危甚尚記此不忘焉子鎮卿附生

春熙舉人

彭壽頤字丙元號子文由副貢生中己酉順天舉人旅寓京師七載學益進咸豐四年賊匪竄萬倡議六區團練賊退後不果行五年今爵相曾國藩兵駐江西頤上所著團練新編曾躋其才識六年賊踞萬載頤時在省間道歸與舉人廖連城等起忠義軍得勇千餘人六月擊偽監軍朱賊於盧市經羅城突遇踞方塘偽指揮陳賊兵千餘與戰我兵稍却六月廖

連城分兵防港口十二日賊大至我兵乘賊半濟擊破之斃
悍賊三百餘方塘賊由是去時賊固守瑞州大兵攻之不下
頤謀舉兵進擊因無口糧兵遂解散十月仍與六區紳士舉
行團練六區上下畫分十二團練兵千六百人七年六月瑞
僞總制嚴賊突官兵圍出陷上高頤召集團勇將率以防徐
渡適賊殲於上高乃訓練十日而罷頤在軍芒鞋蔬食與士
卒同甘苦以是得士卒心抱削平宇內志不竟其用命也自
幼卽負奇氣與人有肝胆爵相曾甚奇其才嘗語人曰彭子
文江右人傑也頤卒曾聞訃甚悼惜之以二百金唁其家
柳承培號凌雲慕東平王之爲人孳孳爲善和鄰睦族憐貧恤

萬載縣志

卷二十 人物下

五十六

寡與夫祭產墓田諸善舉解囊不吝城中族建大祠獨捐千
金邑中公事賓興堂都城會館及寒衣因心義山等皆竭力
資助自念先世以儒起家曾祖發位邑庠生祖瑚郡庠生父
廷藩歲貢生已爲貧廢學末世其業故隆師課子尤加意焉
於邑中先達靡不敬禮袁郡昌黎書院唯萬邑未有分齋方
欲舉行而病起遺命其子繼成之子勗豐德輝并能推廣父
志除建昌黎分齋外本鄉和豐義倉捐穀數百石族建支祠
捐金數百并助基址龍雲書院助膏火田子德輝舉人孫召
棠邑庠生

潘縣花號海門邑附生朝運子文有奇氣遇一題不輕落筆構

思良久忽如風雨驟至一揮而就歲開館從學者衆各隨其材質高下而成就之尤好義蓮江石橋被水衝圯捐館穀以爲之倡衆遂樂輸修整如舊邀同志建慶豐義倉積穀數百石歲飢平糶衆皆德之子梓材孫紹岳俱舉人孫紹華邑附生

李宗周字安灝大學生幼負奇氣稍長肆志於學爲文一遵先正不屑時趨以致久困場屋自是絕意進取專以督課子孫爲事邑中公事矧賓興堂修文廟考棚歲飢平糶諸義舉無不竭力捐助性和易然不可干以私排難解紛片言立決鄉里益推重之孫春萼拔貢生壬戌舉人

萬載縣志

卷二十 人物下

五十七

辛字林字泰增邑增生歲餘失恃父遊京師因赴京省父父卒扶襯歸遇劫盜躍入舟中砍一盜落水羣盜散次早盜思報復字林攜僕踪跡至野店中有數人坐飲心知爲盜夥卽入店治具力拽盜臂邀之共飲盜知謀泄且憚其勇不敢復犯父在京久積金不多易簣時遺囑餽親族共千數百金悉遵父命析產時以厚貲讓弟擇腴田數十畝以膳繼母仗義疎財凡有義所當爲者解囊不吝家落傾產課子子孫無異業人迂笑之不恤也子榮暉夢周森皆文庠孫渤選拔中順天

副榜

彭英晉字三瑞大學生正直不阿鄉里有爭至則立解或代錢

陰寢其事不使其人知後亦不問也賓興堂爲邑中大公事
初起時衆議不一幾於難成晉竭力襄成之凡橋路勸募無
不與且量力傾囊焉課長子以均學甚力遠訪名師至典質
以供修脯鈞弱冠補邑增孫幾邑附生夢彰壽頤俱舉人汝
昌邑附生曾孫金邑增生

宋文斐字錫廷號竹泉髮冠倡亂助官軍餉數萬得獎叙授福
建雲霄廳未到任霄城已陷斐捐貲募勇隨

官保左宗棠協力同勦克復漳州雲霄等城霄城南經兵燹滿
目凋殘斐下車撫綏善政次第舉行民賴以安積勞成疾居
官數月終於署喪還之日居民素服哭送者盈溢街衢左制

萬載縣志

卷二十 人物下

五十八

軍援例入奏奉

旨賜卹予蔭孫容照承蔭州判

唐澄號鑫門舉人工詩能文善書法尤精於奕時與國手戴秋
士對奕自是藝益精著有怡怡草堂奕譜梓行春秋大勢五
古陶情集待梓兼精岐黃堪輿大挑二等署吉安府學教授
歷署龍泉雩都德興教諭鄱陽萬安萬年訓導皆有聲選授
義甯州學正未任卒

謝興榮字騰芳大學生性剛直鄉曲間排難解紛一言立決慷
慨好義邑公事有嬰堂賓興堂修學校建校建試院捐輸或數百
金數十金不吝鄉里橋路廟亭量其費之多少而資助焉孫

尙斌紹暉曾孫樹勳俱文庠

龍應飛字起鳳積學敦行言笑不苟家故貧訓課後進不計修脯尤工史傳學故及門士多以古獲雋經理邑中諸公事以廉介始終中同治甲子舉人旋卒

劉黼朝字簡瑜監生習舉業應試有聲數奇絕意進取嚴於課子定學約終歲不令出塾自治經外詩文皆授名人矩矱性孝友母嬰未疾背負出入庶母患瞽扶持一如所生兄負累爲邀親友伙助數不敷復命二子足成之邑公事如改建崇文間出義粟平糶皆身任其勞爲族督十數年纂修家乘興廢繼絕晚年家益困手卷不釋恬然也所著養拙山莊近體

萬載縣志

卷二十 人物下

五十九

詩未成帙而卒子式穀由歲貢登鄉薦徽猷席纁孫楨俱文庠

喻炳字景階號星臺郡附生道光辛巳舉於鄉出邑宰名進

士衛鵠鳴之門得卷驚爲老宿數上公車屢薦不售常以讀書得榮封父母爲念選都昌教諭 救贈父如其官家貧爲諸生時課門徒卽不事時下脂粉登賢書者羅運齊盧瑤林郭備最著常主講龍河上高景高及郭氏義塾館穀外不取一錢教諭都昌棄束脩數百金而歸優游林下不與外事卒年八十二文稿多散佚士論惜之

汪茂楠號石森性聰敏弱冠補弟子員治家一循柳氏家法經

理祠事尤盡善督房族數十年能以身教諸子姪輩無一人
敢爲非者邑中公事如修葺學宮捐助龍河書院膏火創立
義倉悉傾囊爲倡首晚年譽望益隆屢舉鄉飲正賓鄉里咸
推重焉雖常經理公事而手不釋卷爲文不尙時趨援例貢
成均非其志也孫瓊林邑庠生

盧後慰字望顯大學生副貢及暉子繼胞伯廷曦後性忠厚孝
友無間言尤樂行善事鄉邑義舉多與焉初隨生父爨有佃
戶周負債將鬻妻以償慰與生父謀以本年應得田租近百
石悉蠲免周由是保妻孥今生齒益蕃感謝弗衰析產一遵
生父命不計較多寡肥瘠兼推讓已分內產戚里至今樂道

萬載縣志

卷二十 人物下

六十

之幼讀書能文晚兼精岐黃術多所全活不受謝併有餽以
藥貲者鄉鄰有爭力爲排解制行公正不以運蹇易操延師
課子孫家漸落自若也子夢蘇文庠孫汝寬舉人汝源文庠
郭呈輝號蘊石邑附生少孤性孝友冬夜恒爲母溫被病則飲
泣不食私行禱祝人咸異之家貧授徒出告反面終身孺慕
母老犯腸澣侍湯藥累月不解帶常置方正學座銘於案頭
言行悉遵之後進多所造就與人爲善至今衆猶悅服焉

鍾宣章字天植號斐亭兒時志趣不凡讀書識大意不屑屑於
章句以父命抵京援例捐從九職籤分甘肅試用未二年丁
父憂歸哀毀幾殆以母年老服闋不復出子姪七人延師訓

課不吝脩脯歲暮解館命背誦所讀詩文一字之訛必懲治
家嚴肅自奉儉約而宗族鄉黨周濟無所吝修橋梁道路施
棺木瘞骸骨諸善舉難更僕數卒年五十七歲次子斯敬舉
人有傳三斯卓副貢生

江 濬字能哲號慧齋嘉慶十二年由歲貢生選授建昌府南
豐縣訓導讀書有根柢經史百家靡不貫通獲選時年已七
十六歲接見諸生與論文藝猶縱橫馳騁聲如洪鍾竟日不
倦歲已巳恭遇

覃恩加一級

勅授修職郎辛未入秩同寅製錦稱觴門生悉躋堂介壽忽得痰
萬載縣志

卷二十一 人物下

六十一

疾卒

吳 鵬字向科號南軒少穎異弱冠遊庠旋食餼爲文灑灑落
落下筆千言立就試輒跨其儕伍屢薦不售年五十以明經
貢成均日與族人講明孝友睦婣之道立祠規修支譜爲族
督數十年族人皆愛敬之歲甲辰部選大庾訓導時年已八
十歲

國朝定例凡選者皆詣大府考驗出題後援筆凝思文如泉湧尙
能伏案作小楷手眼無老態大府驚異欣獎趣之官至則扶
植風教導勵羣材陞調樂平教諭不赴年八十九歲告歸優
游林下又五年九十四歲卒子六孫十八能世其業

鍾斯敬字挺莊號仲輿一號慎齋辛卯副貢壬辰

恩科舉人甲辰大挑一等分發廣東大吏發審積案剖決如流奇之委署開建建僻邑南靖書院久傾倒士子無棲身所敬亟捐廉倡修資助膏火時詣書院講指授文法復因公下鄉召父老教以男耕女織孝弟力田民有爭訟卽時處斷並諄諄勸諭三年士習民風頓改愛敬若父母師長父老百數十詣大府請留格於例不准改署吳川川濱海寇肆劫報無虛日又值粵西洪秀全作亂擾及鄰省縣缺先有得選者憚不赴敬捧檄至捐俸倡修城濠督辦團練日下鄉勸勉實力奉行或留宿練局竟月不回署詞訟及一切事皆就所在裁決甚

萬載縣志

卷二十 人物下

六十二

年成勁旅賊至屢挫斬馘數百高州四屬其三皆被害惟吳川獨全咸豐元年制府徐廣縉至高上謁求解任不允次日詢知因公負累鉅萬積勞成疾乃准卸事令在高調養未幾制府奉命進勦粵西欲挈往辦軍務辭制府曰他人求之不得顧獨不願豈此間缺反有美於彼耶笑而從之既而糧台需才檄召至一年又墊二千餘金引疾歸東省上憲廉知其情欲以大縣調劑固辭請開建自効至又值林謝二匪糾黨千餘侵擾縣境亟練勇堵禦有竄入者輒殲戮之建藉以安是年以軍功陞同知直隸州知州適新興鄰匪竊發肇慶九屬多被擾上憲憫其勞顧無可委署者召至慰遣之

莅任團練保甲並行募勇嚴守藩籬戒毋越境貪功時穀價昂貴復出俸開倉賑濟民賴以活境內未受蹂躪擢綏遙同知不赴調署陽江未匝月病卒年六十七歲生平以經濟自許未遇時倡建東洲書院加意培植勉爲有用之學以故文風振興人材亦由是出在粵十餘年攜眷屬不過七八儉約如儒素循聲播遠邇上憲屢欲大用卒以才能受困州縣身後不名一錢賴寅好賙贈得歸葬子敏生捐發廣東知縣

鍾玉明字敏生號朗卿斯敬四子幼聰穎授之書輒成誦長具幹才隨父宦粵東佐治有聲癸丑丁內艱扶柩回籍適髮賊據縣城楚師進勦與邑先達籌餉辦團贊襄不辭勞瘁後又

丁外艱念父宦粵十餘年因公虧帑破家不能償服闋心快快父舊好爲捐指省知縣到粵委城內總查未匝月暴卒

宋成祥小字潤發曾祖雲起厚重有威儀鄉里欽敬遇紛爭經其排解罔弗帖服去足跡從未履公庭家素貧非義之財一介不取死之日無以爲殮遠近聞者皆趨弔厚賻之喪祭如禮外且爲經紀其家祖馨兆邑庠生父觀麟生二子卽故家益落母吳氏改嫁王姓次子成發隨養成祥其長子年幼賴祖母楊撫養成人咸豐六年長髮賊據縣城投都司劉培元部下當勇遇賊輒與聞軍中由是知名後投虎營充馬隊第四哨哨官轉戰江西浙江福建廣東積功累保花翎游擊同

治四年退賊至嘉應州連戰皆捷進攻城幾拔賊懼宵遁成
祥帶馬隊天明追及之欲一鼓蕩平鏖戰至日中忽中礮卒
先是大帥以其連旬力戰擬保副將未及上而亡大帥痛惜
之奏

聞照副將例賜卹給賞葬祭銀一千零廿兩並給雲騎尉世職襲
次完時給予恩騎尉世襲罔替卒年廿七歲未婚無嗣撫憲
札飭以胞弟成發承襲俟生子卽與過繼接襲

藍光苑號藝圃二十四都西坑人邑增生幼穎異弱冠補儒學
弟子員爲文力追先正不苟隨時俗以故屢薦不售爲諸生
祭酒數十年以敦本務實爲先恂恂雅節道路相遇不問知

爲先生弟子也撿芹香登賢書者指不勝屈義甯進士陳文
鳳從遊七載受益尤多性嚴正咸豐五年髮賊竄踞鄉里無
賴輩爭先從賊苑時爲族督西坑藍氏丁壯不下二千餘人
無一敢投賊者年九十餘猶誨人娓娓不倦人爭詫爲一邑
靈光云

潘立鳴字瑞生高村人天性純篤事親以孝聞由勤儉致富慷
慨好施與雍正初溫上貴犯境府憲李英扎起團練鳴捐錢
穀爲倡與鄉耆藍渭濱義勇陳輝玉嚴林森羅老滿等協力
捍禦不惜身命賊竄至新昌奮勇驅逐獲上貴逆黨遂平縣
憲施昭庭獎以忠義可風每遇年荒給粥食活窮民無算凡

府縣省考舍書院橋路寺廟育嬰漏澤一切利濟之事及有
關人心風俗各義舉無不悉力爲之約捐五千金有奇門前
大江爲通湖湘往郡縣大道舊架木梁十數遇洪水行人多
不便時已衰老命其子易石梁乾隆間子貴麟榮麟華麟富
麟佩麟承命建三墩四管兩旁圍以石欄兩岸有階級以居
南川號南山橋因地名之也程工五載費萬四千餘金同里
進士李厚岡甚嘉之贈以聯縣憲孫給樂善好施匾孫文彪
武舉曾孫維新邑廩生

饒學謙字發祥例貢生性純樸尤敦孝友兄弟七人析爨時得
租僅二百餘石見兄弟食指繁以已田租六十六石讓之田
值八九百金出之無難色亦無德色蓋其天性然也每歲暮
陰察族鄰窶乏無以卒歲者召之至給以穀不索償其慷慨
好義類如此

饒廷楷字殿輝學謙子職員孝友性成尤殷利濟有父風凡城
鄉義舉無不踴躍捐輸道光辛卯壬辰歲薦飢減價平糶貧
民賴以聊生居恒爲里黨排難解紛扶危拯困一切裨益於
人之事尤難僕數高魁書院本饒氏別墅道光初族人欲別
售楷獨倡爲義塾且捐銀三百兩助成之

鍾天宣字開元父早逝事母年踰羣耄未嘗分任兄弟居家嚴
肅數十人無詬訐聲遇鄉間排解事不憚煩捐建東洲書院

為衆領袖其他義舉不可殫述

范立臣字興邦例貢生言語謹慎器量寬洪足跡未嘗入公庭好讀書初起塾課會出錢穀為族中子弟束脩費旋倡修起秀書院捨丸藥救溺女活人甚多鄉里中艱於掩埋者施棺瘞之卒年七十四子世杰文庠

黃金印字連文監生遺腹產事母得歡心兄四俱早歿刻苦自勵撫好輩如己出竭力支持數十年不倦鄉里推重之喜接文士構家塾課子姪勸捐高魁東洲兩書院且通人緩急不少恡歲歉出穀平糶凡此義舉如造橋發路修廟宇建蔭賜亭立惜字堂皆與有功柏樹街石橋倡首任勞厥功甚偉年七十三卒子啟圖增生龍圖丹成俱文庠

萬載縣志

卷二十

人物下

六十六

曾起鱗字元濱大學生謙和誠樸好義諫財少業儒後精岐黃術活人無算不索謝遇乏藥貲並濟之打鼓墻橫埭子捐置義山三處建五百輿年豐倉東洲高魁兩書院以及修郡城施棺木橋梁道路輒傾囊無少吝治家儉約延師課誦甚殷勤卒年八十一子士俊庠生孫玉樹廩生玉山文庠

唐逢辰

詳藝文墓誌銘

王公遠好善樂施助育嬰堂銀建餘慶源遠萬年三石橋又助修蓮溪福善等橋其他亭路寺廟多所樂輸知府張額獎族光里字士美亦好行陰隲曾建仁里源田二石橋修長槽石

路五百餘丈道光辛卯歲飢出粟賑濟全活甚多又捐置大
坳義塚二處光杰字士開建河家塢石橋石路歲歉設法平
糶鄉人咸感之

謝公漢字昌元四區龍田人力田致富自奉儉約而樂施濟每
遇歲歉輒平糶貧無錢者貸之不責償嘗設粥廠活人甚多
郡守程聞之額以尙義可風

王如綸字珩珍附貢生讀書明大義咸豐六年舉人彭壽頤優
貢廖連城起忠義軍在港口殺賊千餘如綸與有功十一年
賊踞新昌逼萬載自備口糧募勇八百起保泰營父子公孫
督勇親冒矢石屢獲勝仗克復新邑中丞沈奏請以縣丞選

萬載縣志

卷二十 人物下

六十七

用 部議改儒學訓導尋加捐中書科中書銜卒年七十三
子孫並邀獎叙

黃華原名呈瑞字奎銘少習舉業博通經史爲文專以才氣議
論制勝初應童試邑侯陳衡文得其文大加稱獎已而學使
按臨以不善書被黜令捐監赴鄉試屢薦不售性豪爽有幹
才遇艱鉅事輒身任爲人排解罔弗帖服一鄉推爲祭酒族
衆事繁積未清理幾構成訟舉族督不旬日悉臻妥愜生平
好義凡所當爲悉解囊爲之不少吝於兄弟尤友愛出入與
偕咸豐元年

詔舉孝廉方正邑人欲以膺選謝曰廉方正猶可勉强至於孝自

反能無愧乎堅辭不就年五十四卒弟呈祥字奎鎔優附生
博學能文邑侯衛鵠鳴器重之爲人忠厚和平與兄華最相
得出必隨行人稱爲難兄難弟云

楊羅峯字响和號皆山大高祖文庠仕紳割股養親世有隱德
角卅卽聰穎異常爲文洋洋洒洒暢所欲言弱冠補弟子員
出名臣汪文瑞公門下優行補增登道光壬辰賢書性豪爽
解紛排難有魯仲連風倡建六區龍洲書院及邑龍河書院
倡捐膏火束脩以勸捐出力紀錄二次縣城傾圮督修西北
二城當粵匪滋事時慨然以天下爲任咸豐二年就館萍鄉
適瀏匪竄擾督批丁分路堵勦淨盡保舉教諭銓選泰和咸

萬載縣志

卷二十八 人物下

六十八

豐十一年粵匪踞新昌督率練勇首先陷陣克復鄰城

欽加國子監學正抵任泰和兵燹後學校遂廢以清俸修復之時
進都人士倣胡先生法課義經治事使俱爲有用材不數年
科甲蔚興雖年老報罷年八十餘卒於旅邸櫬發傾城拜奠
河干有涔涔淚下者其得士心如此

郭如衡字位南號此山例貢生性孝友髫齡聰穎爲文有奇氣
名噪場屋積學數十年有推倒豪傑之概數奇不偶援例人
貢非志也生平仗義踈財常助田數百畝於 至聖誕辰
行釋奠禮學使孫記之又憫貧無以葬者倡立義山捐助育
嬰凡邑中諸義舉無不竭力贊成里黨推重焉卒年八十三

子殿魁副舉用中附貢生

劉廷棟字正柏號培谷例貢生持重有識事父母先意承志一本至誠父時耕最鍾愛之甫受室公私家政父悉委任當是時家食指浩繁而處置內外帖然父沒喪葬如禮理家政數十年毫無私積以故雍容翁好無間言最加禮師儒迄今都人士猶稱江口劉尊師重道於不置寒士投贈稱貸無吝色邑中公事恒踴躍爭輸暇卽臨池揮翰法宗顏清臣經史子集及願體集諸書每於父與賓客講論時益潛心體會先是時耕與辛少宰從益立有啟元書院獨擇棟經理其事迄今俎豆莘莘卒成先志少宰序時耕家傳墓誌以燕山五桂目之不虛也年七十邑舉人辛辰雲廩生張居敬進士盧昆鑾作壽文旋卒瀘溪舉人篆儒學訓導盧諤作墓誌足垂令名於不朽云子文瀾 恩貢生

盧及芝字魁蘭一字和生號商山郡附生道光丁酉舉於鄉幼

聰敏入家塾背誦輒冠其曹弱冠補弟子員爲文深入理窟矩獲一廩先民性廉介非公事從不妄入公門人笑爲迂不顧也家貧授徒講學多所造就常主講龍河龍雲書院及郭氏義塾遊其門者多恂恂雅飭不徒文藝之工人皆詫其能以身教也倡修六區龍洲書院纂修盧氏族譜俱以廉能稱大批以教諭用未及任卒

劉文毅字麒孫號瑞生時耕孫廷杰子郡附生道光戊子舉於鄉幼聰穎爲文清矯拔俗弱冠補弟子員性豪邁有才幹邑中諸義舉多委任之義豐倉倡首勸捐爲一邑先分修縣城邀同志力任東北門數百丈郡修府學邑中專請毅任其事至樂頌堂邑乘奎文閣義山袁郡先代祠無不經理而總歸有成爲人修偉長髯雍容雅度遇事鏡燭犀剖咸服其有應對才雖性近揮霍矢公矢慎毫無侵漁邑人士咸相諒也大挑二等署永甯縣教諭授崇仁縣訓導經師人師多士如坐春風焉因艱解組旋卒未獲大展其才士論惜之卒年六十躬邀

萬載縣志

卷二十 人物下

覃恩榮贈祖父

胥賓賢字秀發號楚翹父邦慶兄弟四賢其家督也幼喪父理家政卽井井有條弟三人教讀婚配俱底成立質聰穎雖內外兼營而讀書目數行下弱冠補弟子員旋食餼爲文清真俊逸靜氣迎人以故試輒高等登膺房薦卒困棘闈命也晚遇

覃恩貢成均家稍裕尤樂行善事遇歲荒每減價平糶有難民過境常倡募賑之三四十金不吝邑中義舉無不與以讀書之未顯揚也課其子益力常曰光大門第惟賴詩書卒年七十二子澄由府案入郡庠醕茗邑廩生

楊運昌字鳳宗二十三都岐陽人大學生性孝友幼失怙事寡母色養備至母患目疾禱於神不茹葷者三秋目復明人咸以爲孝感母節孝建坊悉身任之不責兄弟也性恬淡慎交遊喜施與課子孫必延名宿重道尊師至今尤炙人口長子承俊力學取僧生困小試遂棄舉業專精岐黃多所全活貧者至贈以藥資孫澍已未武舉輝郡庠生孫獻邑庠生

辛基泰字新科大學生性渾厚和平尤樂施與家稍裕鄉里稱貸不能償不索也貧無以葬者輒施棺所費不下數百金同治四年叛勇竄萬所居距城數里賊搜劫民家有數賊入其舍索金帛泰拒之賊劫以刃大罵之賊怒縛之罵益厲至死

萬載縣志

卷二十

人物下

七十一

不絕口時年八十有三聞者至今痛焉春慶見父被殺抱父哀痛賊並殺之孫綉麟武舉

盧昆鑾

詳藝文墓誌銘

周樹贊

詳藝文墓誌銘

陳盛森

詳藝文傳

盧爾泰國子生幼讀書卽知問孝父母疾終夜不寢同懷五人泰居長並相友愛有私金任用不吝生平喜讀書人堂弟必顯好學苦無資屢遣從名師游及館中費悉任之子鰲運飛俱郡庠

盧周南號麥舟邑庠生幼聰穎能才

書寫善詞曲天性豪

爽見堂兄武舉道南訓生徒遂精業兼應武試入邑庠既而
遊門下者四人入三七人入六縣府道試並冠軍者屢次鄉
會獲雋者十餘人樂平殿元汪年姪也京邸同寓以射每失
鵠踞求教一爲指示無虛發遂得殿元自是名播京師棄世
後無論大小場武館中咸祀奉之其教澤及人如此子光魁
武舉技勇與汪相伯仲以病卒於京人並惜之昆杖丙俱遊
庠

辛有猷字旺年號克齋父家政家貧以醫名多隱德生猷兄弟
三人其伯家源課之學閉戶潛修苦心孤詣以魯得之猷其
有焉弱冠應郡試二覆經題爲鼗磬祝圉猷博引經義灑灑

萬載縣志

卷二十 人物下

七十一

洋洋郡守大奇之拔冠軍遊庠後九專精古學宏覽約收杯
酒談文舉諸經疑義無不核悉橫及子史上下數千年纍纍
如貫珠一時淹雅之名傾動公卿舉辛卯鄉試詩文俱粹人
爭傳誦江右元燈俱驚未墜會試屢薦得而復失者再一時
名公鉅卿倒屣歡迎留京數載無不知有辛克齋者居家孝
友所得館穀分潤仲弟無少吝以舉人充 咸安宮官學漢
教習需次教諭所得不副所學未任卒於同年樂明府署士
論惜之著有經解古文待梓子再午副貢生炎邑庠生

郭沛霖字潤桂號雨蒼例貢生爲人渾厚和平樂行善事歲饑
減價平糶貧不能娶者必出金爲之完配凡邑善舉無不竭

力襄成喜讀書人專以經史課孫子晚年家漸落課讀益殷
延師脩脯卽典質以供備極豐隆其尊師重道罕有能及之
者享年七十三歲親見五世同堂孫柄楠繼祖志力學不倦
淹通經史弱冠補博士弟子員名甚噪爲邑侯崔所器重鄉
試屢薦得而復失者再僅貢成均所得不副所學士論惜之
楠不計也常自言曰人生事業貴垂諸不朽無徒浮慕夫虛
名生平品行端方與人甚有肝胆臨難不苟免人咸推爲義
士焉

周其修字成獻號勉齋父學吉積學未售年少失妻遺二子吉
撫育二子誓不續絃人咸義之其修其長子也家貧年將冠

萬載縣志

卷二十 人物下

七十三

幾棄舉子業旋以是年遊庠資性聰敏博聞強記由是文名
大噪學使李芝齡歲試臨袁修試古學奇之舉拔萃科旋中
順天鄉試詩文俱粹爲文清真雅健如一筆書以故一藝出
爭先快靚抄寫殆遍一時紙貴會試薦未售以大挑一等分
發福建署德化縣事化瘠邑也修至齋厨索然清苦如食貧
時教士愛民靜以治之時修父就養猶布衣也修欲爲父援
例入國子學苦無貲潛商幕友貸白金使人抵省將發父知
之力辭恐累修也修亦不能強其廉靜類如此修以奇才屈
百里而不獲大展其抱負士論惜焉詩古文詞俱華瞻不自
收拾散佚無存者

廖斯雲六區人父奕昌以勤儉起家性好施與尤憫貧窮乞者
至率給米以升而用之不竭比卒猶積有白金三千餘兩斯
雲厚重木訥慈惠宅心與人恂恂若恐有所忤父没子立寡
兄弟無賴子窺其富而且弱也佯稱假實給去否則竟橫脅
稍不厭百計構陷斯雲不計較率多與之以故晚年三千金
盡更舉債焉萬邑土產山居惟藉竹篋紙爲生故竹之重與
禾麥同鄉禁暴嚴有竊者公罰或鳴官懲治斯雲性寬邏察
素弛一日其子往山見刊竹徧地竊者遠颺歸告父命僮往
取斯雲曰渠旣費力刊任渠昇去可也何取爲其雅量如此
生平未受書願特重士同里馮豫福初未相識歲暮窘甚偕

其鄰藍某來丐貸問需若干曰五六串足矣如數與之馮要
期還笑曰君讀書人寥寥者何足道竟不責償後其孫連城
十歲從馮受書馮曰勉之乃祖德厚食報將在汝也連城於
同治元年舉於鄉

宋仕豪字掄廷號文苑父維新正直多幹畧遇公事不辭勞瘁
仕豪賦質敦龐宅心仁恕居家孝友人無間言推誠交友畀
以重金絕不過問人亦卒無負者邑有義舉如考棚義倉賑
濟城工奎星閣諸要務或獨力承辦或首先倡捐皆慷慨傾
囊無少吝自粵匪竄亂以來前後捐餉不下十數萬其他義
行不勝枚舉常自言曰賊能平便是福寥寥者何必較晚年

手格言一編訓誡後嗣他人是非長短緘口勿言芒鞋竹杖
徜徉花徑晏如也享年八十二歲 旌表五世同堂子鏞附
貢生四川候補知府階明浙江卽補知府殉難有傳炎舉人
宋麟書字吉慶號玉庭恩貢生家貧嗜學作文根底經史不尙
時趨工書法得右軍之髓餼庠三十餘年屢試高等從游者
多所成就生平守正不阿邑公事恒倚爲重居家孝友人無
間言爲族長以嚴正稱享年七十九著有文集待梓

顏鳳儀字禎祥號韶九工詩文書法未弱冠遊庠爲諸生歲科
試輒高等遂食餼登丙午賢書家甚貧母老諸弟不能營生
仰事俯畜惟館金是賴有餘卽爲諸弟完娶館外二十餘年

萬載縣志

卷二十 人物下

七十五

所得皆爲家用不私一錢比卒無以爲葬鄉黨宗族皆高其
爲人

黃星堂字夢詡號垣三幼繼胞叔爲嗣長事寡母得其歡心於
本生父母同胞兄弟亦曲盡孝友道光己酉舉於鄉兩赴春
闈不售遂絕意進取閉門經史子集皆流覽考究古今利弊
瞭如指掌而恂恂謹飭未嘗以才智先人生平渾金璞玉宗
族鄉黨皆無間言子屏周末弱冠遊庠能讀父書

劉如松六區上坪監生公正爲鄉人所推服因亂辦團屢敗賊
屹然爲一方保障咸豐十一年奉扎隨優貢廖連城進勦新
昌克復城池以勞瘁卒於軍缺餉驚其業以償在事皆邀獎

叙松獨殺賊殞其身家併卹典亦不及邑人哀之

賴炳熹字復廉號曉山性剛毅遇不平輒怒必直而後已篤志
芸牕欲以經濟顯不屑爲時文而沉浸經史時文亦精深屢
爲各宗工所激賞鄉薦得而復失者再鬱鬱不得志年四十
得羸疾遂艱於步咸豐六年官軍勦賊於其里扶杖往迎欲
條陳時事路遇賊竟爲所戕士論惜之祀省昭忠祠

郭文煥字貴珍大學生爲人黜華崇儉尤以恕道自勉常語人
曰人生不忠良至死爲下鬼經理邑公項及家祠事皆謹持
管鑰遇事有暇輒手不釋卷年五十餘遂絕意進取崙以課
孫子敦經爲務手植蘭數種倦則灌溉以適其情有姪中窘

萬載縣志

卷二十 人物下

七十六

厚分金以與之子徽與廩生敷典濟南俱文庠

辛景榮字萬慶號葆真邑附生資性慧敏弱冠應縣府試屢拔
前矛邑先達皆奇之一時有國士之目爲人循循雅飭公介
和平雖少年若老成焉邑安泰義倉接管時遺穀無幾榮增
穀千餘石且置產管理龍河書院謹管鑰慎出入衆論翕然
家不豐而喜急人急雖不償不計也居家重孝友兄弟間雖
異母而以大義處之諄諄訓誨俾各毋忘先人德意故於家
廟恒欲聯其族誼將以家乘訂修而艱於取資殊自歎焉卒
年四十餘

郭師弼字欣逢附貢生性軒爽尤篤友誼與人有肝胆不屑屑

治章句學而爲文秀發稱其人弱冠與弟師泰同補博士弟子員咸豐年間邑重建學宮除伊父捐貲外彌墊用數百金不責償常與同族曉堂森林子俊玉書蔚然炳奎並弟師泰八人携酒談文上下千年動中肯綮有搥碎黃鶴之槩時人稱爲八元友有緩急雖多金不吝邇年管理學宮事適當疲憊之秋彌振興墊補百孔千瘡靡不周匝與同事者分任其半漸有起色忽以勞疾卒人皆惜之

謝殿傳字廷樹號雲峯一都四畝人中咸豐元年武科六年在
大審口辦團出力十一年與武舉張弼臣管帶保安營禦賊
於羅城獲勝五月偕舉人廖連城保和營克復新昌城池麻

萬載縣志

卷二十 人物下

七十七

田之戰廖連城先進遇賊鏖戰多時兵無後繼殿傳獨率勇
趨進助勦殺賊數多叙功保升守備

曹啟瑞五區十七都一畝裏源人賦質英勇矢志從戎隨左宮
保營轉戰數省累建功勳保舉遊擊同治六年往陝甘勦賊
首先冲陣鏖戰至日中忽中駁卒上帥痛惜之奏

聞請從優議卹奉

旨贈叅將銜給卹銀五百兩並給雲騎尉世職襲次完時給恩騎
尉世襲罔替

辛學乾號健齋西都一畝人登咸豐壬子科鄉榜弱冠食餼爲
文援筆立就不假思索而切理屢心雖宿學有不逮當逆髮

踞萬伏處潛謀引官軍入援勦辦籌餉殫心瘁力復郡邑城
池乾與有力性謙和而遇事抗直有胆氣使見用臨大節見
危致命乾其有焉登賢書不數年卒士論惜之

韓觀字从誠號介侯性聰穎讀書自數行下弱冠補弟子員房
薦十次堂備者四年逾甲始登道光癸卯賢書主試者爲張
文毅公最器重之下郡守牒有韓觀余門下士也品學兼優
素所傾慕之語平生沉靜寡言耄而好學爲文力追先正祭
酒諸生數十年遊其門者多騰達新建夏大史未遇時常贊
文門下省垣黃世家也觀年幾七十猶以重金聘主講以母
老力辭母年近百齡奉養最得歡心終身孺慕孝友無間所
萬載縣志

卷二十人物下

七八

作制藝甚夥而不自收拾晚乃手訂百餘篇將付梓疾革時
猶囑其姪卒年七十餘

彭光燦字榮蓀號絢莊以道光己酉武科隨營撫標得靖安把
總雅歌投壺恂恂如書生需次撫標垂一紀燦固貧也親族
赴省闈者每科必豐腆延寓盡歡乃已重然諾與人甚有肝
胆雖置身武仕最喜與文人遊談及經史亦畧曉大意官靖
安小邑也燦日練所部卒靖雖小隱然爲長江重鎮同治辛
未年十二月縣齋匪忽嘯聚夜半突入城時縣令潛逃燦與
麾下廿餘人及次子三子鏖戰至五更以眾寡不敵身被十
餘鎗猶握刀作拒賊狀从乃仆與其次子三子俱死平明賊

潰散而燦一家殉難中丞上其事需恤焉年四十餘

彭士模字球孫號儀齋弱冠與胞兄親兄同遊庠一時榮之中
道光辛卯鄉試詩梓闈墨人爭誦焉負姿穎異爲文酣暢淋
漓如其人模身長王立氣象崢嶸望而知爲偉器族修譜牒
六區創龍洲書院邑中增置龍河膏火及修城垣皆力爲倡
助底於成乃已掌教龍河及龍洲造士有法門下多知名士
卒年六十有奇子星煥邑附生

謝天南字聖恩號箕垣三齡而孤事母以孝聞由議叙分發浙
江先用府經歷 欽加州同銜杭嘉湖道笏堂劉公以讀書
有得諳練老成器重之歷奉差委有賢聲署桐廬縣丞悉就
理尋丁艱卸事紳耆製送一來即去百姓無緣等牌回籍哀
毀成疾未及暮而卒年六十子學貞邑庠生

胡石峯三區厚槎人自幼即亢爽有胆氣咸豐六年赴湖南巡
撫駱營由什長授六品軍功同治元年拔補外委積功至四
年以游擊補用並賞換花翎五年加叅將銜七年被民團戕
害奏請照陣亡例議恤給銀五百兩給雲騎尉襲次完時給
與恩騎尉世襲罔替

郭治秩號攸叙監生軀幹修偉事親以孝聞家故貧以勤儉率
四子漸臻饒裕邑中義舉量力捐輸無吝色倡修四都回龍
橋行人便之契管木箕江象形山壹片與支祖維衡墳山連

捐助入祠爲同支寃宥之所爲人正直是非無假借鄉鄰有
門者一經勸處立解自念己身及子學業未成乃屬望於諸
孫延師訓課不惜脩脯嘗謂爲善最樂讀書更佳汝曹宜三
復斯言孫備己未舉人

王光新字士高六區例貢生富而好施穀貴每減價發糶待佃
人尤厚遇歲歉輒免租嘗率其弟光命脩富山石橋糜白金
一萬有奇復脩潭前灣石橋及橋前後路三十里悉糞以石
糜白金二千有奇其輕財好義如此

彙傳

王永誠性倜儻琴書自娛不樂仕進構綠筠清室與易節郭瑾諸人觴詠其中觀察胡槩記之有綠筠詩卷藏家

袁秉清進城鄉人正統十二年助賑粟一千六百石給冠帶天順五年又助六百石立石

楊久瓊東都人正統十三年助賑粟一千六百石給冠帶

彭希節東都人景泰四年助賑粟一千二百石旌表義門

周仲信西都人景泰四年助粟一千二百石旌表義民

龍志霖景泰七年助粟二千石題旌

辛秉儀西都人成化三年助粟二百五十石給冠帶

萬載縣志

卷二十 彙傳

龍時清龍時振東都人成化三年各助粟二百五十石俱給冠帶

陳福榮白良人成化間助粟官倉數百石賑饑題旌有碑

龍大志成化丙午助粟賑荒給冠帶

龍大寧奉例納粟備賑有司獎賞給冠帶

郭致仁號洞山性逸宕不羈與邑士以詩倡和後薦召抵京擢經歷不仕歸卒年九十二

李廷顯徵古後裔宏治間修龍河浮橋橋圯復改立渡又設渡林家磨建亭憩待渡者修竹潭橋及上峯矮陂石橋更鑿井山麓濟渴甃淨安寺前路三百丈舉鄉飲卒年九十六

龍尚茂字觀美幼失怙能自立邑有義舉必與正德間積粟數百石平糶濟荒知縣陸璫獎之

龍昇震奉例納粟備賑知縣顧獎給冠帶

彭本鑿號兩江家不豐而好施於所居小水水口創建石橋上列屋數楹工方舉會疾卒子襄陽教諭遵教畢其工人稱兩

江橋諸太史大綬爲記

龍郎嘉靖十九年出粟賑荒給冠帶表曰義士

宋一鳳因雙虹橋久圯捐貲改建石橋具載橋碑

鄧南春庠生屢試高等晚年捐粟備賑知縣劉舉鄉飲給冠帶年八十餘卒子繼守年亦入秩受冠帶

萬載縣志

卷二十 彙傳

二

鄧南居年九十六舉善民鄉飲十二次給冠帶

龍濟亨性深沈有俠氣邑令周曾遭官謗挺身代雪一時稱奇

胥橋東都人性長厚嘗捐修高村石橋萬曆元年以近郭徐家

塘田七十餘畝并四圍山場概助學宮院道獎給冠帶孫大

順大化游庠

按舊志載半價入官後橋子孫照補半價百二十緡充公因參改

張桐號後峯宅心公平喜爲人解紛萬曆改元給冠帶知縣徐

一唯常延訪以得失年七十四卒

彭池萬曆三年正月父蹕病危遇游方僧指點割左手肉和藥

進之愈知縣徐申獎

辛曉鳳生平好義萬曆十六年灾荒人茹草根樹皮惻然曰何

取有餘爲出粟三百五十石助賑院道獎異後舉鄉飲

孫如琳萬厯戊子己丑輸粟備賑鄉黨賴之子益美游庠

譚燧字德明幼習舉業論時務得失洞悉窾會里中人有緩急竭蹶相赴萬厯丙子龍河橋圯於水獨力重建己丑大祲券而求者差等授之粟貧不能償輒焚其券一夕鄰燬於火燧居且危迫忽風反而免咸謂善報臺使者旌其門給冠帶年九十六卒

龍匡仁庠生饒於財平時修橋葺路荒年濟族賑鄰知縣鍾畢皆重之子運開亦游庠

丁顏八字爲南萬厯中父守忠久病不痊因叩天流血封左手

萬載縣志

卷二十一 彙傳

三

肉熬湯進之愈地方呈縣申獎

鄧繼寵事繼母以孝聞爲人謹厚公平年九十七舉善民屢赴鄉飲六經按院獎賞

龍匡信性醇厚事繼母以孝聞知縣畢申獎隱德

王珪蘭樸雅篤實年八十七舉鄉飲給冠帶子觀恤族賑饑知縣畢委督修城有功亦舉鄉飲不受

袁鉞字伯威樂義好施里中有善舉必捐貲襄其成建牟村橋偕其姊節婦出金爲首臨終凡借券皆焚之子女汝楫庠生捐修東樵書屋更名東井軒延師開義館歲助館穀貧家子弟多賴成立

宋福謙號柳潭事親孝多善行知縣畢舉鄉飲子良翰篤學善詩萬厯歲貢未仕卒

辛御典好善樂施人稱長者知縣畢獎以額年九十卒

歐陽學孝友謙和知縣畢以樂善申獎

王萬行以椽吏任貴州鎮遠稅課大使恪恭厥職院道獎異張璧贈有詩卷

郭宏量字懷吾好行其德曾捐金爲友置妾延嗣修葺廣報觀崇信寺楊公嶺路康樂兩河宜春秀江安福鳳林諸橋皆出金以助又創建峰頂山大尖峯庵置香火田倡修宗祠三舉鄉飲不就署縣侯舉爲鄉約卒年九十三

萬載縣志

卷二十 彙傳

四

李耀芳萬厯年間買田二百餘把助學署縣吳額獎之孫時植時樞游庠

譚德宗庠生安貧苦守襟懷灑落彭之龍宋九德輩雅重之

汪自東字二憲屢試高等以數奇老諸生生平尙義蠲貲周急時饒田鄉痘疹盛行嬰孩暴亡自東或施湯藥或給食用獲全活甚衆咸稱廣濟先生至老抱病子會通割股以進雖未獲痊猶延喘數日亦不忍父死之一念云

周名恭父母早亡撫幼弟如子事莽叔如父賑貧恤乏有古人風雨舉鄉飲子經邦游庠

陳仲楨好施予族鄰喪葬不辦卽捐囊助知縣陶給冠帶舉鄉

飲後修丁田橋助木石不計子懷信亦樂輸公

鮑奕明乳名坎仔賣腐膳母萬厯中母病危剖左股和藥愈院道獎之母歿督學胡給銀助葬

楊仕紳庠生割股救親知縣倫郡理伍交獎之

龍洪泰卹貧賑荒邑令倫獎之行善愈篤月給多江渡募費葺水府廟晚年得子構砥玉軒專師課之年七十卒子延璧游庠

張汝術爲人忠厚有犯不校貸不責償知縣倫獎之年八十三鮑燮急公好施知縣倫給冠帶舉鄉飲後助修丁田橋

辛明都字建和處族黨一以仁讓有不能婚者力爲完娶知縣

萬載縣志

卷二十一 彙傳

五

姚舉鄉飲不就子守忠庠生

翟章昌甫之後積德好善捐修潭埠橋遇饑輸穀助賑三舉鄉飲壽近百歲

周民蒸少通經籍耽詩詞山林寺觀多所題詠鄉里推爲亭老一切利弊興革勘踏修理悉秉公正舉鄉飲固辭年八十九卒人稱古雅先生

丁承坤年九十二知縣陶舉鄉飲給冠帶後督修丁田橋有功郭宏翔醇謹慕義與物無忤萬厯中有侵其祖塋墓者廬其側三年得以無事卒年七十三子一偉廩生一俊一傑一級俱府庠孫士佩士進歲貢生士連士玉俱邑庠

伍夢熊急公尚義修丁田橋與有力焉署縣張舉鄉飲

彭世懋字德開庠生澄之後嘗捐修翠巖書院集俊髦砥礪其中風雅而尚俠士樂交之施棺修路傾貲不惜世懋席累世宦業積而息之致富易易耳顧置不問獨於先世著作及有關宦蹟文字蒐輯珍藏以示子孫亦有足多者

喻應瑞號合川生平詩酒自娛賑饑砌橋築庵皆不吝曾拾道旁遺金追而還之不受報知縣姚給冠帶年八十九卒

喻應楨號慕衢喜讀書好吟咏凡置義田修路平糶皆助焉知縣姚舉鄉飲

周以銘稟性忠厚值歲饑出穀以賑萬厯中督修康樂橋獨任

萬載縣志

卷二十 彙傳

六

一管二墩澄渡興江津梁皆爲修葺知縣姚旌以額

張顯庠生萬厯中修康樂橋獨任一管知縣姚舉鄉飲子大維孫奇珍庠生

張文儀泰昌元年母宋氏雙目掩矐數醫不效文儀方童稚慟泣籲天願以身代割左股和藥母目復明知縣姚題旌建坊孫耀宗字文宇年十二卽持齋見庵觀佛像頽壞橋路缺陷輒捐助修理貧不能娶者助之娶家以是落不悔年八十卒子希聖游庠希賢貢生任寧州學正

彭紹美字世濟幼孤撫弟倍篤性敏而文屢試弗售遂棄去以課子爲事子復古式古皆以貢任教諭

彭天資庠生壯志弗耐遂就隱家無擔石儲嘯歌自得萬曆丙辰舉鄉飲給冠帶年八十四卒

陳曰俞父生員天表病危割左股和藥進之旬日而愈時年方幼親鄰欲舉報曰俞固不可遂寢彭自新爲作傳

周汝謨增生苦志潛修持身耿介鄉黨族戚無間言年六十八卒

彭天贊以掾考任福建建寧主簿居官有聲在家修橋葺路凡饑疫死者施棺瘞之并豎石亭於龍河渡林家磨爲行道憩息所

彭應成由典史授照磨自甘隱逸致政不仕居家奉法循禮

萬載縣志

卷二十一 彙傳

七

彭夢瑞萬曆中母冷氏雙目內障夢瑞齋戒七日割左股和藥母眼復明題旌入明史孝友傳

按明史作天啟年間事

汪自霖字躍龍三歲失怙事母孝有田六千餘把以多讓兄自取三分一資膳養而已子德度游庠

龍宗海天啟二年母鄧氏病危遇醫執方書示以股肉可愈夜自割炊而進之幸延六年母歿事繼母辛如所生知縣陳申獎孝行

龍九錫號榮所歲貢不仕貞介純謹苦志力學常自作水龍吟年八十卒

郭萬嘉助棺賑饑拾金還原主邑稱善人子士玠等游庠者五

孫九人爲諸生

譚嘉憲家貧奉母以孝聞拮据教子子經黼游庠

張正亮賑饑修路葺橋梁知縣李舉鄉飲

歐陽啟桐崇禎四年同男侃四送杉木百株修學知縣韋明傑
額獎之

辛應象崇禎六年母彭氏病篤刲左股救痊次年復病亦如之
知縣韋優獎

周樞生平樂善子某游庠早世依姪貢生顯終其餘年崇禎八
年知縣韋擬申獎適卒年九十六

彭以筐號紹塘性瀟灑結精舍桃花巖口延師課子生平疎財
萬載縣志

卷二十一 彙傳

八

好義知縣曾宜高舉鄉飲孫鴻鵬邑庠

聶興煥字文吾謹厚與物無忤濟乏施棺里中稱仁慈長者卒
年八十八孫璧成庠生

周卿邑庠生樂施廣濟兩舉鄉飲

譚飛龍有聲賢序亦兩舉鄉飲子燧孫嘉儒俱游庠

張周勉錢糧早輸兩舉鄉飲

龍霽年九十五歲三舉鄉飲

國朝

辛明韜字鳴泉父光英篤行孝友隱居自適縣舉鄉飲不赴朝
少讀書家貧服賈養母母喪年已七十猶呱呱作孺子泣家

既漸裕以周急解紛爲樂尤好行陰德如還遺焚券諸事雖
妻子不使知爲七房族長五十年宗規整肅御史值重光廉
其良善特加優獎卒年九十二子敏芳有傳

楊一龍字猶龍少孤祖遇用課之讀詩文皆精贍教授生徒專
事醇正貧者悉爲曲成邑令陳公瑛邑紳喻子賢皆延入治
所爲子師所得修奉悉公之昆弟爲營舍資性介不容人過
友朋敬憚如嚴師家雖貧恬如也子發庠生

辛炤字元弼順治初歲貢知縣高鵬起甚重之嘗助土二丈創
建文昌閣

劉應選字柱石濟困解紛爲鄉里推重世隸軍籍領運三十餘

萬載縣志

卷二十 彙傳

九

年不惜破產以全族衆順治丁亥奇荒輸粟賑饑知縣高鵬
起額獎之凡兩修環溪古刹助田資香火卒年八十一子世
傑有傳

譚經祺字謙夫性慈好善嘗遇商人衣被罄空遂解所有與之
渡江拾遺金坐待原主歸還微經祺其人幾投水焉丁亥奇
荒備席瘞餓孳子偃拔貢生

王試琦幼失怙事母以孝聞丁亥奇荒散粟給族全活多命鄉
有爭訟多爲勸解人稱彥方再世年登八十有六

郭一鳳字文徵性嚴正直聲著於時訓子姪以敦睦邑令梁嘗
造廬致敬焉卒年八十三孫邦藩歲貢任崇仁訓導

郭大章字孟叟邑庠生幼出繼事所後所生以孝聞志行高潔
知縣韋明傑目爲奇士年八十四爲族長諄諄勸誠感受薰
陶後舉鄉飲子閔遠孫達士綸俱游泮

龍璜字匪石邑庠生好讀書制行端方不入公庭教子孫以行
恕年八十猶應試弗倦

聞斯達字則兼邑廩生家貧好讀少廬父墓朝夕焚香祈母壽
日記功過著有周易講說及門龍文炳等廿餘人誦法不衰
唐之臯字克允邑庠生性醇厚堂兄家貧同衣食二十餘年兄
歿撫姪如子田產婚娶皆仰給焉子開晉邑廩生開仕庠生
並以文名孫裕猷武舉光華光表裕才俱游庠

萬載縣志

卷二十一 彙傳

十

龍堯典字君則事寡母至孝待人長厚有古人風子學勤孫韜
俱庠生

宋文芳字毓和家故貧事父母能如禮仲弟季弟欲異爨芳涕
泣勸止後析產取瘠推肥人皆賢之年七十四卒子元輔孫
映蛟應發俱庠生

周煥字炳如庠生好讀書曠達自喜家貧無戚戚容姊子敖璉
甫二歲而孤煥攜與同居教誨如子洎登賢書猶撫摩若嬰
兒璉亦依戀若父煥沒乃歸敖母事煥妻不衰

辛汝楫字以濟邑庠生事繼母得其歡心嘗貸銀爲人完娶後
生四子慙不能償轉撫慰之方康熙戊午饑家中落日惟食

粥見鄉鄰乏食者仍分給焉卒年近九十

郭邦重字伯仲爲人醇樸貧能自守年踰八旬卒

劉世傑字漢臣邑庠生豪爽樂善歲饑買米賑濟全活甚衆居
家嚴肅喜接賓朋撫姪惠愛族屬稱之年踰八十卒子宗向
宗理孫洪範俱邑庠

郭士聲字公選西都人性剛介是非不少假借無隻字入公庭
壽九十六子磐邑庠

鮑椿齡字俊年庠生以孝義聞母病痢椿齡妻服侍甚至姑愈
而氏染疾卒齡時甫三十終身不續娶或勸之曰妻爲吾母
死何忍更有妻年九十六歿

秦府志

汪世豐字維新東都人以勤儉起家鄰里是非力爲排解待師
尤敬知縣何錫命龐驥額嘉之壽八十六子廷麟庠生廷獻
歲貢生任訓導孫之圖歲貢之文之永庠生

易象乾字子清西都人秉公仗義爲邑長所重壽八十九

汪映昌字選元東都人性好學九旬猶試童軍夫婦齊眉俱九
十七而終

郭士奇字公亮西都人少孤善事寡母刻苦自勵爲諸姪完娶
年九十三

辛汝梅字以調邑庠生重然諾尙氣節康熙甲寅戊午間兵荒
相繼人多死徙竭家貲招集賑貸保全無算年逾九十知縣

嚴在昌以誼切維桑獎之 以下俱新輯

辛汝灝字定遠歲貢生父金聲在庠序有名灝敦行力學喜周人困捐修道路若石岐及牛角冲上下高田費三百餘金卒年八十七

龍喜齡東都人乾隆乙亥饑減半價出糶乙酉又饑流民載道長子培次子琦又半價糶儲粟不足乞糶以繼貧不能糶者設粥於家賑之凡三月捐金七百有餘

辛金鱗字池飛年十五補弟子員事繼母以孝聞癸亥歲饑出穀數百石平糶知縣朱崧額獎之

胥袞字補之郡增生仗義疎財修康樂橋遷建文廟皆量力捐

萬載縣志

卷二十 彙傳

三

賞倡乾隆二十四年捐田十九畝助龍河膏火知縣張立中守備沈瑄並獎之舉鄉飲年七十九卒

易瓊字廷選監生讀書好義邑改建學宮形家以文峯爲言瓊慨捐七白金建塔南城外科名由是增盛今後裔置產爲修塔費

辛廷臯字欽堂歲貢生學問深邃文章恬雅從遊經其指授悉有規矩遷建文廟勸捐經理以公勤稱知府陳額獎之

聞廷佐字宏毅劄貢生性慷慨乾隆癸未乙酉間連歲荒廷佐謀於族減半價糶以濟本宗復謀於邑有力者捐貲買常平倉及鄰邑穀佐以雜糧各坊一局學爲總局平糶以濟城鄉

全活無算子附貢生之詠有父風嘗捐田三百餘把爲族人授室資

陳賢書字秀升監生乾隆乙酉大饑捐金四百平糶多所全活彭賢賡字韻洋邑廩生博學能文工詩精於考据性至孝出爲世父後事生母與所後母俱得歡心生母亦寡並爲請旌建坊爲人公平嚴正鄉里推重屢薦棘闈四十七歲卒著有碧蒿藏山稿分宜林進士邑人辛少宰爲之序子才囊文庠辛金騏字鶴廷佃儻好施乙酉平糶人賴以濟袁家墩有貧鬻妻者輿在門矣召其夫予金全之遇行不協義者據理直繩無所阿曲

萬載縣志

卷二十

彙傳

四

辛錦瑤號崑圃邑庠生爲學宮首事修文廟建考棚立育嬰堂悉有力焉善解紛身未嘗涉訟卒時老母尙在遺命以孝服殮

辛標字中文庠生孝友出至性念兄食指繁讓父產而多予之歲饑倡族平糶戚族告乏解橐不吝有無力婚娶者出金爲完配而自奉儉約脫粟縕袍晏如也創祠宇置祀產建城隍廟皆身任其勞次子炳席增貢生灑落有幹才工左手書於坊市族祠諸事能持正無瞻徇有疑難數言而決邑公事時賴匡襄孫家源歲貢曾孫有猷有守舉人

鮑啟仁字子良監生慷慨好義倡立潭埠社倉獅子橋地捐募

增修平糶甃路從不少恡嘗捐金置祠產後族拓祠建塾咸
取資焉子震岡武舉忼爽有父風與歐陽韶仁倡立樂育義
塾獨築上潭堰開石圳農田賴以濟以五世同堂請旌年
九十卒

歐陽韶仁字德安急公慕義尤篤本原既倡首新大祠構支祠
並置祭田以維永久又倡建義塾以教族子弟若潭埠樂育
之建合鄉人士咸賴之歲遇荒歉設法平糶晚年值邑公事
力肩其任至顛踣風雪中負逋鬻產不爲悔卒年八十

易大有字德成武庠貌俊偉喜讀書交游皆文士購書延名師
課子伯仲皆以文入泮三子金鳳武進士四子金麟武舉以

萬載縣志

卷二十一 彙傳

五

金鳳游擊銜 例封武翼都尉

龍賓字羽卿歲貢生擅書名足跡所經求書者屢滿戶外賓興
至疾書各厭其意意所不可無能強也年六十餘卒

郭功曦字恆庭例貢生少孤事母孝以貿易致貲財伯兄中窘
助之數百金邑值多故塾用至千金竟持空券不責償辛卯
饑平糶儲粟數百石又買貴加數以濟之捐助寒衣局經理
多載悉得宜又捐田百把助賓興家累日深不顧仍延明師
課子孫子陶文庠

高樹藩字芸圃監生有幹才敦族誼倡構長溪支祠其十房合
祠既與孝廉湘文捐貲倡首身走各鄉村聯絡勸輸司其出

納積而息之凡數十年卒底於成又以其羨置祀產立郡縣
試館族人翕然咸服推爲族督邑有大事慷慨直前受千金
累不恤尤尊禮文士子作楫郡附生孫在梁武舉在志文庠
張學鵬字搏萬監生生有至性兒時遇歲祲見父母憂迫私詣
鄰媪借粟聞者咸異焉初習舉業因貧就商父歿兄且析爨
鵬獨力養母竭愛盡誠出則囑婦奉事語刺刺不休母病已
危猶購參進及歿哀毀骨立扶柩渡江中流遇風幾覆鵬抱
柩大哭風爲頓止自是終身手顫云生平疎財好施義舉勸
捐立應尤敬禮文士構友竹莊延名師課子孫年八十四卒
孫居敬爲邑名諸生

萬載縣志

卷二十 彙傳

夫

陳方蓮字潤宗監生積苦起家好施予邑中善舉莫不應臨終
以行義屬其妻吳已而義倉合下吳命子縣韻勲捐穀七百
石爲本畝倡迨四五區建龍雲書院先後捐金八百錢千餘
緡又以三百緡助修學宮二百緡助龍河膏火皆承其志

歐陽訓字春協幼夫怙事母以孝聞家貧賃春爲業而勸季弟
讀甚殷日以所得資躬自送贍凡十數年家漸起弟亦入泮
生平剛方樂義鄉族多愛憚之子職員洄監生源克承先志
公事力以身任嘗捐貲助祠產建郡縣本宗試館歲饑倡族
平糶凡賓興義倉書院惜字局皆有堂及一切義舉或助或
倡莫不量力爲之孫文蔚文炳俱文庠

辛磐字奠安廩貢生少孤事繼母劉孝母膺末疾湯藥必親奉
凡十餘年不倦待伯父炳金如父事必咨稟視羣從如同胞
推多取少同居數世無間言足不涉公庭業產被侵占佃戶
強梗悉不校以是見重鄉族紛爭經調處輒帖然生平謹齋
自持至倡建支祠助寶興田辛卯壬辰平糶量力捐貲不悛
其餘助婚葬焚券施藥皆優爲之然謙退多遠慮族舉房長
邑舉孝廉方正賓興舉董事皆辭後際多故咸服其先見云
袁智達積苦起家鄉曲義舉捐錢不惜子附生建原監生建校
職員建序能繼其業郡拓建考棚捐地基二十餘丈嗣因試
館逼近官議估拆又捐半價助修公所邑起育嬰堂賓興堂

萬載縣志

卷二十一 彙傳

七

修考棚學宮並有貲助

辛家政字安成炳席子從九品職性伉爽嘗在大橋市遇偷而
獲咸勸鳴之官不可曰是非積賊絕自新之路開妄攀之門
肥捕役害良善吾何安乎又有里民賃居者同舍或誕其婦
色欲據之里民勢不敵泣訴居鄰政偕宋杞文力保全之卻
其謝有姪與同儕口角幾成鬥訟姪急赴懇斥之曰朋友何
至是必爾所爲不善奮掌欲批之逃儕聞而內愧事遂解曉
精岐黃術活人甚多臨終檢積券焚之曰吾爲子孫省事始
政生而富厚迨父以揮霍散財遂中落因攜三子鄉居督課
甚嚴卒成其志有猷有守舉人有爲文庠

何蔚春字文芝邑廩生孝友誠篤生十月失怙事母得歡心胞
叔早世孀以愛繼他子家產中分春事孀無異母力學弱冠
游庠連試十四高等癸酉堂備居鄉以裁成後進爲務門下
士多成名者公事竭力贊襄建賓興修邑志皆始終其事管
理龍河書院增田數百把念昌黎書院無邑人肄業所勸柳
姓建之族構祠修譜皆其力子榮綬郡學生

